

四庫全書

史部

欽定四庫全書

廣西通志卷九十四

諸蠻

歷朝馭蠻

按司馬遷五帝紀唐堯南撫交趾三苗來賓帝舜
在位蠻夷率服禹貢要服之外曰荒服三百里蠻
謂去荒服三百里有天竺咳首僬僥跛踵穿胸僇
耳狗軹旁舂是謂八蠻也

天竺尚浮屠咳首男女
雜聚以笑咳為謔僬僥

人長三尺趨踰卑處不為容止踈踵行立不正穿
胸穿五色線以被胷前偕耳作大環貫耳垂眉三
寸殺狗繫輪曰狗軹比隣擊杵
以聲相和曰旁春皆西南夷
二百里流謂有罪

者流之荒服去而不返也商伊尹正四方西南曰

甌越桂國

即今粵地

損子雕題漆齒

生首子則解而食之刺繡花紋以飾

額曰雕題俗嗜栴榔其齒皆黑曰漆齒

商道衰而周太王亶父有翦

商之志泰伯逃之斷髮文身以開荆蠻周公相成

王南方有越裳氏以三象重譯而獻白雉曰道路

悠遠山川阻深故重譯而朝公曰德不加焉則君

子不饗其勢政不施焉則君子不臣其人吾何以
獲此賜也使者曰吾受命於吾國之黃耆曰久矣
天之無烈風雷雨意者中國有聖人乎有則盍往
朝之周公乃歸之於王稱先王之靈以薦於宗廟
周德復衰於是稍絕宣王中興南伐蠻方其後三
百四十餘年而楚子稱霸南併蠻越自是遂隸於
楚秦始皇帝使屠睢統五軍征蠻戕其渠帥蠻人
入叢薄中與禽獸處莫肯嚮秦者已而任囂略定

蠻地置桂林南海象三郡徙謫徙亡命萬五千人
戍之天下叛秦尉佗自立為南越王魋結寘踞以
從蠻俗諸蠻地廣數千里有閩越甌越駱越甌駱
佗所謂裸國者也漢高帝初定天下厭兵釋佗弗
誅因王之武帝元鼎中誅併南越乃置蒼梧鬱林
等七郡為縣五十有六然粵地東北半隸楚與武
陵蠻接壤更置零陵郡縣官索歲幣蠻不堪命輒
相率反伏波樓船之師歲或再下其後百三十餘

年而王莽篡荊州平林兵起諸蠻景附光武既除
莽亂以餘力討平之當是時雖置郡縣而蠻習殊
異語言不通男女野合饑則糾衆椎牛時出寇掠
詔徵任延爲九真太守鑄田器教之耕稼始設婚
禮申明約束於是徼外蠻舉土內屬開境千八百
歸漢里君安帝初徼外蠻舉土內屬開境千八百
里桓靈之季四夷不賓谷永守鬱林招降烏潯蠻
十餘萬獻帝建安中徙交州治於廣信詔邊吏得

建旄鉞授鼓吹以威蠻人昭烈繼統與吳分荊州
嶺表以南諸蠻之地悉撫而有之尋復屬吳孫權
遣中郎將康泰南使外番諸番之國界交廣間區
落連亘以百千計種類殊詭泰還作扶南風俗記
以獻晉武帝咸寧中徼外蠻入貢永嘉南渡宋齊
梁陳之間南北割據勤兵中原交州而外蠻獠荒
僻率棄而不有隋氏混一廓清嶺表置桂州總管
以刺史侯莫陳穎儀同劉方先後領之蠻酋李光

仕李佛子莫崇等望風詣降大業五年西南夷入
貢盡納邊地囊括八方於斯為盛煬帝志求珍異
航浮日南兵屠林邑諸蠻乃復叛拒而中國亦敝
矣唐興鑒隋之禍分置五管經畧使綏靜百蠻然
諸蠻或自為酋長擅誅死不通朝請天子簡重臣
鎮之諸所設牧令委寄山島中若懸疣控御失宜
則依險阻併黨援機毒矢以待將吏炎嶠瘴篁蜂
屯蟻附不可爬梳故當時所部咸謂之羈縻州峒

朝廷禽獸畜之不深治也太宗貞觀初嶺南蠻馮
盎等迭相攻擊上用魏徵言遣李公淹持節諭降
高宗儀鳳間始安蠻歐陽倩擁衆數萬入寇桂管
招討使裴懷古自詣其壁示以誠信羣蠻大悅遂
納款德宗貞元中西原蠻黃少卿攻陷邕管經畧
使楊旻裴行立請擊捕積二歲竟無功妄奏斬獲
二萬以罔天子穆宗長慶初蠻叛如故詔以嚴公
素為嶺南經畧使公素疏請討賊祭酒韓愈上言

臣謫嶺外熟知蠻情其酋無城郭宮室自謂峒主
狀服言語都不似人居常亦各營生急則負嵎走
險比緣守臣不得其人侵欺束縛致生怨恨蠻獠
之性易動難安或尋私仇或貪小利獸聚鳥散終
亦不能成事行立等邀功倖賞用兵以來歿傷疾
疫十人而九既不可盡誅徒糜饋餉臣實悼之前
所奏斬俘不下二萬人賊豈復有孑遺今轉滋盛
足明欺誣伏聞更以嚴公素經畧蠻事竊觀公素

亦非撫御之才畧無勝算復請窮剿如此而嶺南
終無寧息之時也乃請三事一併邕容兩管為一
道我軍進止得藉聲援一以南征士馬不諳徑巢
瘴鄉羈旅人無鬪志若就近募充費不增而士皆
便習一察賊情形亦甚厭苦不如因改元赦其前
過當必散降因而撫之可安邊境上皆不納自是
之後右江諸郡歲歲苦兵陵遲至於五代劉隱僭
國獨據嶺表深結諸蠻偽署官號宋既受命乃克

蕩平於是稽唐之制分晰其種落大者為州小者為縣又小者為峒有知州權州監州知縣知峒又有同發遣分發遣之屬謂之首領餘曰提陀猶言百姓也其田計口授耕世世隸屬謂之田丁田不可盡給則逐畜牧而轉徙無定居自渠長以下椎髮跣足貴者衣斑布環牛革以財力課殿最苟利所在不顧禮義父子分異父貧則質身於子出入腰弓矢伏草射人得卮酒則捐軀報仇睚眦弗讓

其法殺人者不死出金錢牛畜抵罪無以抵者任剽掠有所擄獲因而予之否則沒為奴婢發徵期會刻木為符緩則烏合急則瓦解俗尚悍梗不可盡以中國之法治之猶羈縻勿絕而已太祖開寶中蠻酋莫宏普遣使奉表內附求給印綬許之太宗雍熙四年宜州蠻莫淮閭倡亂詔書招撫明年撫水蠻蒙令扎等寇邊詔官其酋長以風諸蠻乃奉職真宗咸平中復入寇宜州守將逐捕得數

十蠻械送京師上廷見而釋之已而復叛乃命供
奉楊守珍安撫使俞獻可等分路擊捕蠻依深篁
中時戰時却獻可等募山獠為嚮導設伏掩擊數
破之皆詣軍門納降守珍為稱詔旨赦勿殺但歸
所掠貨畜與之要盟然諸蠻乃愈益驕橫逆節萌
起窺伺中國仁宗慶厯中思恩蠻區希範廣源蠻
儂智高相繼舉族反殺守臣稱帝制屠戮州邑千
里為墟此其最酷者也於是乃詔安撫使杜杞宣

撫使狄青發荆揚卒數萬人先後討之逾年乃平
翰林承旨張方平奏曰國家每脩契丹元昊不知
嶺外猺蠻接連交趾衝突疆宇患生肘腋懷氏之
亂主上為之盱食可為寒心今淮甸日益戍守而
嶺南卒無防禦是守堂奧而撤藩籬也乞下諸司
修治城堡簡士練甲以待緩急上從之英宗治平
初詔左右江諸州峒籍其壯丁聽帥司調遣神宗
熙寧中以章惇為察訪使招納諸蠻蠻皆相率納

土願輸貢賦自梅山達於宜融諸州更置潯江等
堡比內地焉哲宗元祐中議者以為納土置吏經
費不貲諸蠻或稍叛去朝廷亦務休息乃復廢棄
徽宗崇寧五年帥臣王祖道黃忱等復議開邊收
復蠻峒四百五十有奇高宗紹興時安撫使呂愿
中誘降諸蠻矜狼獠狗之屬三十一種得州二十
七縣一百二十五砦四十峒一百七十九凡置知
州各一令簿曹官提舉巡檢指揮之屬各如干人

禁衛之士三千焉當是時州無租稅諸所置官軍
歲支餉廩數十萬皆仰給大司農而嶺外諸州蕭
然煩費矣又詔湖廣移賦以給之濬河通道千有
餘里飛芻航粟湖湘之民罷焉乾道而後諸蠻時
戢時肆寧宗嘉定間頗增築城堡然朝廷方苦女
直歲議戰和未暇經制蠻事也而咸淳中天子播
越蠻乃復叛拒元移宋祚威振嶺南世祖至元十
四年遣阿爾哈雅下靜江諸蠻部落凡百四十七

戶二十五萬來附詔以廣西隸湖廣行省二十九
年宣慰使烏克遜澤以蠻數為寇奏列營堡置屯
田成宗大德間兩江蠻酋岑雄黃勝許嘯聚剽掠
詔湖廣行省進討郎中謝讓謂諸蠻之性但可懷
柔不宜力競寬法羈縻勿致跳梁可也若舍中國
有用之民爭炎荒不毛之土雖盡斬俘將焉利之
因榜諭招撫泰定中諸徭復叛文宗至順初蠻數
寇邊順帝元統間蠻酋黃氏岑氏復搆亂俱詔湖

廣行省募狼兵協討既平因使戍之自是五溪諸蠻遂入於粵乃設管軍民長官司以土人渠長世典其職至正末土官黃英衍乘中原之亂遂據太平路岑伯顏據田州路諸溪峒悉從誘脅明太祖定鼎遣湖廣行省平章楊璟移兵討之英衍伯顏等懼乃率諸蠻詣降詔貰其罪改路為府設流官監治焉璟還上問廣西左右江邊務璟曰蠻獠性習獷悍難以文治當臨以兵上曰性習雖殊好生

惡死則同吾聞忠信行於蠻貊何必兵也其善撫
之或謂諸蠻不知禮化宜遷其人內地可絕邊警
上曰彼不知禮教而遷之是重挑釁也誠勿輕動
二年蠻酋莫天護納款五年諸蠻復叛乃以衛國
公鄧愈佩征南將軍印拜韓觀為都指揮副使帥
精騎萬人殲其衆明年盡平諸蠻得土州峒寨一
百一十七籍徭獠田得五萬一千三百十六頃輕
其租入以其田十當民之一增置流官然賦而不

役洪武之季崇善土官趙暹龍州土官趙宗壽奉
議土官黃世鐵南丹土官莫金等俱叛詔拜楊文
為總兵官與韓觀協剿擒斬黃世鐵莫金等復業
者千六百餘家增置守禦所成祖永樂中宜州蠻
韋萬皇作亂命鎮遠侯顧興祖討之宣宗宣德初
以總兵山雲副興祖討其餘黨覃公旺等蠻稍悞
服顧南土荒惡諸蠻不靖者累世英宗正統間則
有柳州蠻韋朝振代宗景泰間則有藤峽蠻侯通

三侯大狗鄭昂孝宗弘治間則有古田蠻韋萬賢
武宗正德間則有柳慶蠻韋朝宣穆宗隆慶間則
永安蠻李都堂潘勝喜神宗萬厯間則碎江蠻廖
金濫府江蠻黎福莊周星婆岑溪蠻潘積善懷集
蠻嚴秀珠相繼叛反此皆名為渠魁所過殘暴而
徒與衆多轉相煽播流剗四起又不可勝數也當
是時警報沓至天子集廷議躬親推轂其帥臣則
都御史韓雍新建伯王守仁督臣則殷正茂吳文

華撫臣郭應聘等設畫方略以次勦除而藤峽府
江八排十寨厥功偉焉自是善後諸策次第措舉
迄我

本朝王師一麾千里嚮應稽角効順惟恐後時雖以
吳逆不軌弗從搖惑其他蠢獠如十排三疇八達
鄧橫依其阻箐餉我戈矛自棄王服卒皆滅不旋
踵百年之間伏莽盡消窮陬絕壤與聞絃誦齒於
中土則自唐虞三代以來所未有也惟粵本荒裔

三代而上率以德服漢唐而後徒務羈縻終明之
世乃以力征譬之驕子始未嘗不置之懷抱而其
卒也非捷之流血其啼不止事勢之變漸積使然
曷足怪乎傳曰禮禁於未然之前而法施於已然
之後溯厥源流撫馭之權大畧可睹矣

節舊志
參諸史

徵側徵貳

漢史世祖建武十六年交趾女子徵側與其女弟
徵貳反徵側者麓泠縣雒將之女也有技勇嫁為

朱戴人詩索妻詩索故饒財交趾太守蘇定索幣
不得因以法誅之側忿盡散其貲里中遂反殺蘇
定旬日得數千人西畧地九真日南合浦蠻里皆
應之凡下六十五城自立為王都麓泠南海諸刺
史合兵擊不克數遣使告急詔長沙合浦交趾堅
壁守儲糧穀十七年上以中郎將馬援擊隴西羌
有功拜援為伏波將軍以段志為樓船將軍以劉
隆副伏波軍發長沙桂陽零陵蒼梧兵二萬人討

之軍至合浦而志病卒詔援並將其衆援分兵偵
蠻窟道路悉得其要領於是鑿南塘通九真刊山
木為戰艦千五百艘與貳師軍水陸并進數與蠻
截戰皆破之明年春隆將前部援將後部分屯胥
浦會天寒靈雨隘險淤塞一騎不得進還報援援
曰此天贊也誡士卒各囊沙石鼓行而前羣蠻衆
至萬人皆徒跣挾挺弩大譟逐漢兵漢兵棄囊走
蠻以漢盡棄輜重皆空巢來爭取而援乃獨將精

兵萬餘人間道夜發舟行七百餘里師次浪泊晨
擊徵側軍徵側出不意南遁而貳師軍乃自南皆
會遮擊大破之斬俘凡一萬有奇徵側等僅以身
免援留交趾購徵側懸千金莫能得十九年正月
或告徵側徵貳亡匿金谿穴中乃大索九真谿峒
無功諸蠻說徵側曰漢購大王急今不出亦死無
功雖小聚衆數千人足以待漢且漢師老食盡無
以為也側然之乃與所部九真賊勝陽等潛出據

居風援以奇兵追擊遂擒斬徵側徵貳傳級詣洛陽餘黨皆降徙其豪三百餘人於零陵搜獲器甲七千四百四十事燬銅鼓銅馬鑄為銅柱二立林邑南七十里銘曰銅柱折交趾滅交人震懼援為開示威信如舊約更置望海太康等縣嶠南悉平區憐

順帝永和二年象林蠻區憐率衆數千人攻縣燒城寺殺長吏交趾刺史樊演發交趾九真兵萬餘

人救之兵士憚遠役反攻州郡會侍御史賈昌使
在日南并力討之不利圍歲餘糧乏帝以為憂召
百官問方畧皆議遣大將發荆揚充豫四萬人赴
之從事中郎李固駁曰若荆揚無事發之可也今
二州盜賊盤踞武陵南郡未輯長沙桂陽數被徵
發如復擾動更生他變其不可一也又充豫之人
卒被徵發遠赴萬里無有還期詔書迫促必致叛
亡其不可二也南州水土溫暑加有瘴癘致死亡

者十必四五其不可三也遠涉炎疆士卒罷勞不
復堪鬪其不可四也軍行三十里為程而去日南
九千餘里計人稟五升用米六十萬斛不計將吏
驢馬之食費便若此其不可五也設軍到所在死
亡必衆不足禦敵當復更發此其割心腹以備四
支其不可六也九真日南相去千里發其吏民猶
尚不堪何況乃苦四州之卒以赴萬里之艱哉其
不可七也前中郎將尹就討益州叛羌益州諺曰

虜來尚可尹來殺我後就徵還以兵付刺史張喬
喬因其將吏旬月之間破殄寇虜此發將無益之
効州郡可任之驗也宜更選有勇畧仁惠任將帥
者以為刺史太守還募蠻夷使自相攻有能反間
禽其渠帥許以封侯之賞故并州刺史祝良性多
勇決張喬前在益州有破虜之功皆可任用宜即
拜良等便道之官於是四府悉從固議即拜祝良
為九真太守張喬為交趾刺史喬至開示慰誘並

皆散降良到九真單車入賊中設方畧招以威信
區憐感泣率所部來降凡數萬人為良築起府寺
由是嶺外復平

李賁

梁史李賁交趾人武帝大同辛酉交州刺史蕭諮
以殘暴失衆心時賁監德州因連結諸州豪傑俱
反自稱越帝置百官改元大德諮與高州刺史孫
問新州刺史盧子雄將兵擊之觸瘴熱死者十七

潰而歸詔遣梁州刺史楊驃討之驃以陳霸先為
前鋒至交州賁悉衆來拒數敗北奔嘉寧城丙寅
九月賁復帥衆自獠中出屯典澈湖大造船艦充
塞湖中衆軍憚之頓湖口不敢進霸先謂諸將曰
我師已老將士疲勞且孤軍無援入人心腹若一
戰不捷豈望生全今藉其屢奔人情未固夷獠烏
合易為摧殄正當共決死力取之無故停留生
賊計時事去矣諸將皆默然莫應是夜江水暴起

七丈注湖中霸先勒兵乘流先進衆軍鼓譟俱前
賁衆大潰竄入屈獠峒中戊辰三月兵圍屈獠峒
禽賁斬之餘黨盡降

李光仕

隋史李光仕桂州俚帥也開皇丁巳二月光仕舉
兵作亂帝遣上柱國王世積及前桂州總管周發
尚討之光仕戰敗帥勁兵走保白石峒法尚襲獲
賊黨家口其來降附者輒以妻子還之居旬日降

者數千人光仕衆潰而走追斬之

歐陽倩

歐陽倩始安獠也武后長安癸卯擁衆數萬攻陷
州郡詔以裴懷古為桂州都督仍充招討使懷古
纔及嶺上飛檄示以禍福賊頗解散懷古至則單
車赴賊巢倩聞懷古至愕不知所為乃擐甲出逆
且遣其黨往偵之果無伏騎乃釋甲羅拜曰某等
充山獠為吏侵逼故舉兵自救耳懷古因索酒與

倩酣飲開誠曉譬具道朝廷威愛極歡而去翌日
倩悉獻所掠漢貲物相從降者數萬人

黃乾曜梁崇牽

唐書西原蠻居廣容之南邕桂之西有黃氏居黃
橙峒其地西接南詔至德初首領黃乾曜與陸州
武陽朱蘭峒蠻皆叛推武承斐韋敬簡為帥僭號
中越王廖殿莫淳真崇欝等各僭稱王聚眾二十
萬縣地數千里置官吏攻桂管十八州焚廬舍掠

士女更四歲不能平乾元初遣中使慰諭諸首領赦罪約降環古等州首領方子彈羅承章等請出兵討承斐等自剄一歲中歷戰斬乾曜崇鬱殿淳等七人承斐等以餘衆面縛詣桂州降悉縱釋之大厯中夷獠梁崇牽者復與其種落張侯夏永等連兵攻陷城邑崇牽自號平南都統經畧使元結等皆僑治藤梧州刺史王翊以私財募兵斬賊帥歐陽珪復詣廣州請節度使李勉移牒諸州揚

言出兵援助翊與義州刺史陳仁瓘藤州刺史李
曉庭結盟進討廕戰破賊擒斬崇牽悉復容州故
地捷聞詔更置順州其黨覃問遁去翊遣將李寔
等分討鬱林諸州會哥舒晃反悉師援廣州問因
合衆乘間來襲翊設伏擊擒之

黃少卿黃少度

黃少卿者亦黃峒首領貞元十年攻邕管經畧使
孫公器請發兵窮討不許命中使招諭之不從俄

陷橫潯貴等四州少卿子昌沔趨勇前後陷十三
州邕管招討經畧使陽旻與戰破之元和初邕州
擒其別帥黃承慶明年少卿等歸欵拜歸順州刺
史未幾復叛又有黃少度與別部黃昌瓘寇陷賓
密二州十一年攻欽橫二州邕管經畧使韋悅破
走之是歲復屠巖州斐行立為桂管觀察使輕其
軍弱請發兵盡誅叛者彌更二歲間有斬獲不克
自是邕容兩道殺傷疫疾死者十八當時莫不咎

之長慶初經畧使嚴公素復請討黃氏兵部侍郎
韓愈建言請因改元赦罪宣諭不納後黃賊更攻
邕州刺史崔結擊破之昌瓘遣其黨陳少奇等二
十人歸歛請降敬宗許之

莫淮閭

宋史太宗雍熙四年南丹州蠻莫淮閭作亂詔服
之淮閭有牛逐水草至河池為牙校周承鑒所得
淮閭遣人取之數四弗還淮閭怒領鄉兵劫承鑒

家財盡驅縣民牛畜以歸遂誘羣蠻為寇時知宜
州侯汀無備詔發諸州兵進討汀坐免官兵未至
賊悉遁去招諭宜融柳州百姓及蠻畧人戶曰朕
託兆庶之上照臨所暨撫養是均矧於遐方尤所
軫慮昨以知宜州事侯汀失於綏緝恣吏侵牟致
滋邊寇騷動閭里虔劉士庶及興師討伐畏威竄
逃朕以起戎名釁職由於汀爰舉國章削其官秩
爾等宜體予含垢革乃前非安土厚生保境延世

或尚恣於陸梁當盡剿其族類自是不復為寇

區希範

環州蠻區希範者思恩人也桀黠頗知書嘗舉進士試禮部真宗景德中與其叔正辭應募從官軍討安化州叛蠻既而希範擊登聞鼓求錄用事下宜州而知州馮伸已言其妄編管全州正辭亦嘗自言功不報二人皆缺望希範後遁歸與正辭率其族人區丕績往依白崖山酋蒙趕謀為亂將殺

伸已且曰若得廣西一方當建為大唐國會。有日者石太清至因使之筮太清曰君貴不過封侯乃令太清擇日殺牛建壇場祭天神推起為帝正辭希範皆北嚮再拜謂受天命以區丕績為宰相餘皆偽立名號補置四十餘人。慶厯四年正月十三日率衆五百破環州。剗州印焚其積聚以環州為武城軍。又破帶溪砦下鎮寧州及普義砦。有衆一千五百宜州捉賊使李德用出韓婆嶺擊却之前。

後斬獲甚衆俘偏將二希範懼入保荔波峒間出
拒官軍朝廷下詔購之明年轉軍使杜杞大引兵
至環州使攝官區煬進士普子華宜州校吳香誘
趕等出降殺馬牛具酒給與之盟置曼陀羅花酒
中飲者皆沉醉推仆後廡下比暮始覺驚走而門
有守兵不得出遂擒之後數日又得希範等凡獲
二百餘人誅七十八人餘皆配徙乃醢希範賜諸
谿峒繪其五藏為圖傳於世餘黨悉平

蒙承貴

撫水州蠻蒙承貴真宗祥符中數寇宜融州畧詔以曹克明為安撫使俞獻可為轉運使王文慶馬玉楊守珍等為都監發潭州兵五千人討之上以蠻獠異類攻剽常理不足以剿絕且道險難進敕克明等設方畧攝其酋長但索所掠生口因而撫之克明獻可言蠻人去冬寇天河今又鈔融州諸砦剽劫官舍累以詔旨宣諭曾不悛革臣請便宜

掩擊從之乃與守珍等分路進擊兵次黃泥嶺承
貴守要害悉衆拒官軍克明名山獠嚮導賈勇而
進自辰至午大潰其黨因追襲至中房前村殺傷
甚衆縱火焚其室廬積聚自此恐懼竄入山谷乃
緣龍江南岸而東會日暮過石峽隘險士不并行
蠻復連弩北岸克明遣猛士步涉與鬪至即走砦
又設伏砦外是夜蠻衆大集遇伏發内外合擊斬
俘無算乘勝搜山悉得馬牛享士卒於是曉諭恩

信許以改過承貴面縛詣降克明數責之且犒以
牛酒皆俯伏謝罪及聞詔旨赦令勿殺莫不泣下
北望稱萬歲乃軟猫血立誓自言奴山摧倒龍江
西流不敢復叛凡納器甲五千數願遷處漢地者
七百餘口請改州縣名以固歸順之意詔從之

儂智高

儂智高者廣源州蠻也州在邕州西南鬱江之源
雖隸邕管而服役於交趾初儂全福知儻猶州儂

當道知武勒州已而全福殺當道并其地當道有
女弟曰阿儂全福納之交趾怒舉兵執全福及其
子智聰以歸阿儂亡去嫁商人生智高年十三殺
其父商人乃曰天下豈有二父耶因冒儂姓與母
奔雷火峒其母又嫁儂少卿久之智高復與母出
據儂猶州交趾攻拔儂猶州執智高智高故狡獪
能屬文嘗舉進士不第既就執曰奈何斬謀士因
釋之使知廣源州領雷火頻婆諸峒又使兼知思

浪州事居四年內怨交趾襲據安德州僭稱南天
國改元景瑞仁宗皇祐元年寇邕州明年交趾發
兵討之不克廣西轉運使蕭固遣邕州指使升贊
往使交趾為智高所獲釋其縛問贊曰唐棄安南
宋罷戍卒非智不及願不奢也而荆南兵力弱也
贊曰王者不臣異俗知其冥頑莫革不足以重勞
百姓故且休之荆南諸郡於朝廷疆宇特邊鄙之
末耳然而帶甲百萬粟支十年天子仁聖神武億

兆歸心耜耨棘荆皆捍衛也何以云弱智高引贊
坐賜之卮酒因問贊曰丈夫何乃鬱鬱久為人役
方今交趾擅命經畧失馭邊吏養安孤欲北并衡
湘西蕩甌駱然後乃策進取即不能跨有南海剖
符通使亦與國也朝廷其許我乎贊曰足下以彈
丸之地崛起強逆命天兵所加譬猶竈土掃塵且夫
順天者存昧時者蹶何如卷甲束身納土請命不
失封侯之賞孰與夫首領不保妻子為幾乎智高

笑曰吾固念之事在公矣乃遣贊還奉表以馴象
金銀來獻請歲貢方物上以其叛交趾來歸是開
邊釁拒弗納智高復齎金玉書因升贊請於邕州
刺史陳珙為具疏以聞不報智高既不得請又與
交趾為仇且擅山澤之利遂招納亡命數出敝衣
易穀食佯言峒中饑部落離散邕州信其微弱不
設備也乃與廣州進士黃師宓黃瑋及其黨懷建
侯等日夜謀入寇一夕焚其巢紹衆曰平生積粟

為天火焚無以為生計窮矣當拔邕州據廣州以
自王否則共死四年四月率衆五千沿鬱江東下
攻破橫山砦遂破邕州執知州陳珙等智高閱軍
資庫得所上金函怒謂珙曰我求一官統攝諸部
汝不以聞何也珙對嘗奏不報索奏草不獲遂扶
珙出珙惶恐呼萬歲求自効不聽乃并其屬及都
監張立斬之立大罵不為屈於是智高僭號仁惠
皇帝改元啟歷赦境內師宓以下皆稱中國官名

是時天下久安嶺南州縣無備一旦兵起倉卒不知所為守將多棄城遁故智高所嚮得志相繼破橫貴龔潯藤梧封康端九州殺官吏甚衆所過焚府庫進圍廣州初智高將至守將仲簡不許民入保城中民不得入者皆附智高智高勢益張先是魏瓘築城鑿池蓄水作大弩為守備至是智高為雲梯土山攻城甚急又斷流水而城堅井飲不竭弩發中輒洞潰智高力屈會知英州蘇緘屯兵邊

渡村扼其歸路番禺令蕭注募土丁及海上壯士
二千餘人與智高衆格鬪焚其戰艦轉運使王罕
亦自外至益修守備智高知不可拔圍五十七日
解去繇清遠濟江擁婦女作樂而行遇張忠戰於
白田忠死之去攻賀州不克夜殺蔣偕於太平場
九月庚申破昭州殺王正倫等於館門驛州之山
有數穴大可容數百十人民聞兵至走匿其中智
高知之縱火皆焚死十月丁丑破賓州甲申復破

邕州日夜伐木治舟楫揚言復趨廣州十二月壬申又敗陳曙於金城驛初智高以反聞朝廷命曙就擊之既而楊畋曹修張忠蔣偕相繼出又以余靖孫沔為安撫使畋修聞智高至退軍避之忠偕勇而無謀皆死智高益自恣南土騷然仁宗以為憂命狄青為宣撫使諸將皆受青節制曙恐青至有功亟挑戰故敗五年正月青及沔靖會兵賓州官軍土丁合三萬一千餘人按軍法誅曙及指揮

使袁用等三十一人於坐一軍大振於是進兵青
將前陣沔將次陣靖將後陣以一晝夜絕崑崙關
歸仁鋪智高聞王師絕險而至出其不意悉衆來
拒執大盾標槍衣絳衣望之如火青陣少却先鋒
孫節死之青起麾蕃落騎兵張左右翼出其後交
擊左者右右者左已而左者復左右者復右其衆
不知所為大敗走會日暮智高復趨邕州夜焚城
遁由合江口入大理國得屍五千三百四十一築

為京觀所掠生口萬餘人復其業獲偽印九黃師
宓而下偽官五十七人梟其首城上收馬牛金帛
以鉅萬計智高自起兵幾一年暴殘一方如行無
人境吏民不勝其毒朝廷為下赦令優除復慰拊
瘡痍百姓始得更生先是謠言儂家種糴家收已
而智高叛為青破皆如其謠智高母阿儂有計謀
智高攻陷城邑多用其策僭號皇太后智高敗走
阿儂入保特磨依其夫儂夏卿收殘衆得三千餘

人習騎戰復欲入寇至和初安撫使余靖督諸部
發峒兵入特磨掩襲之雷火峒蠻黃少季執阿儂
以獻初阿儂募男子年十五以上備宿衛少季亦
在選中常得幸儂夏卿欲殺少季少季懼乃說阿
儂與其子智光及智高子繼宗繼封皆繫組詣軍
門降因檻至京師甫至不殺日給食飲欲以誘出
智高或傳智高死乃悉棄市其後西川復奏智高
未死謀寇黎雅州詔預為備御史中丞孫祚又請

敕益州先事經制以安蜀人然智高卒不出其存亡莫可知也

莫公晟

莫公晟者莫淮閭之族而淮邇之孫也淮邇自稱南丹州刺史尋卒有子曰世忍諱歲輸貢賦授如其官世忍死子公佞襲徽宗大觀中都巡檢劉惟忠奏公佞阻遏諸蠻不願納土因矯詔殺之公佞之弟曰公晟憤怒結谿峒圖報復數寇圍惟忠中

傷死詔以岑利疆代惟忠發兵討公晟公晟遁去
乃改南丹為觀州置知州一人曹官一人兵職二
人指使七人吏額五十人以土丁千人隸之又改
懷遠軍為平州設官軍如觀州制高宗紹興四年
宣諭使明橐上言平觀二州處廣右西偏舊常無
慮崇寧大觀間邊臣啓釁奏請置州拓境深入不
毛官軍費用悉由內郡於是騷然莫能支政和間
朝廷始悟其非罷之或謂觀州控制南丹十道諸

蠻平州為西南重鎮兼制三江以故二州獨不廢然州無租稅仰給隣境飛輓涉險或遇蠻寇設伏陰發毒矢中人輒死人畏賊率委棄道路縱然達州糜費不可勝計邊吏欲以刺探為功故時時稱警因以為利遂欲存而不廢比年戶籍日削民多流離或轉入谿峒公私困弊為甚且稅場互市之利又為守臣邊吏所私獨百姓有征戍轉輸之苦誠可惻憫臣以為罷平觀二州便廷議又以莫公

晟於南丹境上不時竊發若廢二州恐於緣邊事宜有所未盡詔令廣南西路帥曹憲司共條具利害以聞於是諸司交言平觀二州困弊已甚有害無益請復祖宗舊制為便詔從其言已而莫公晟率諸蠻來附詔賞之用為本路幹轄五年授南丹巡檢使

莫才都

孝宗乾道六年宜州蠻莫才都作亂聚眾數千人

廣西經畧劉煊討之不克乃遣其牙將蒙明質賊巢諭降才都已而明密書與煊具言賊可破狀才都覺之烹蒙明諸州合兵誘禽才都械送經畧伏誅盡破其黨煊乞推恩明後以旌死事詔官其一子蒙澤為進武副尉

蒙光漸

淳熙十年冬安化蠻突入內地焚砦柵殺居民為亂宜州駐劄將官田昭明與蠻力戰敗死之十一

年蠻酋蒙光漸復率衆抄掠先是敕賜谿峒鹽錢
知宜州馬寧祖甫給一月而止不能遍及蠻部思
立砦將領楊良臣更鎮撫乖方致激變詔罷寧祖
等命廣西幹轄沙世堅討之世堅言官軍與蠻人
兵器利鈍不同宜救沿邊軍吏多置强弩毒矢以
懼蠻人從之世堅進擊破光漸降其黨千餘人

黃勝許岑雄

元史世祖二十九年上思州叛蠻黃勝許擁衆二

萬結交趾為援寇陷忠江二州及華陽諸縣詔遣
程鵬飛劉國傑等發諸路兵討之勝許尋敗走入
交趾擒其妻子殺之成宗元貞二年勝許復攻剽
永口思光寨湖廣行省調兵擊破之獲其黨黃法
安等天德元年勝許遣其子志寶來降四年以兩
江蠻酋岑雄黃勝許等猶屢相讐殺為邊患詔行
省捕治郎中謝讓謂不宜殫中國力遠征因榜諭
戒飭以攜其黨賊稍戢

廣西通志卷九十四

欽定四庫全書

史部
廣西通志卷九十五
六

詳校官給事中臣鄧文泮

檢討臣德生覆勘

總校官進士臣朱 鈐

校對官編修臣盧 遂

謄錄監生臣王元愷

欽定四庫全書

廣西通志卷九十五

諸蠻

黃英衍

明史太祖洪武元年五月征南將軍廖永忠下廣
西左江太平路上官黃英衍及右江田州路土官
岑伯顏皆賁印降十一月遣中書照磨蘭以權齎
詔諭廣西兩江谿崗官民曰朕惟武功以戡亂文

德以來遠頃者平定八閩睽茲兩江地遠民樸岑
黃夙稱著姓率先歸順良足嘉與用免兵威宜昭
恩錫英衍伯顏等其奉職如故尚慎乃心克承休
命宣布朕意輯我居民由是兩江懾服明年改路
為府以英衍等知府事許世襲

黃英傑

初黃英衍之來附也諸蠻酋皆納款獨其族曰黃
英傑弗順洪武二年聚衆萬餘寇鬱林州命總兵

丘廣討之廣未至同知王彬等集民丁拒守賊圍
半月不下會潯州經歷徐承祖亦以民丁千人來
援賊夜遁追擊破之廣至則擒斬英傑廣西行省
言廣右地接雲南交趾所治皆谿峒苗蠻性多畔
戾府兵遠在數百里外卒有警難援乞立衛置兵
以鎮又言英傑寇鬱林皆借民丁破賊是土兵未
始不可用也乞令邊境籍民丁之壯者置衣甲器
械隸之有司有事捕賊無事務農俱報可乃議置

南寧柳州二衛增兵防守

莫天護

慶遠蠻酋莫天護洪武初納款廣西行省言慶遠地接八番谿峒宋元皆以莫氏為安撫使宜如舊制錄用則蠻情易服制曰可已而改慶遠安撫司為慶遠府置南丹那地等州縣於是更置田州泗城二衛亦以土酋岑氏領之而以廣西布政司領長官司三隸兵部武選凡設土官知府四人土知

州三十二人土知縣六人土巡檢十三人皆隸吏部驗封

梁公竦

梁公竦柳州馬平獐也柳州西北界於楚黔諸蠻而與桂平等郡連岡扼險互相盤結永樂間公竦等作亂都督韓觀剿擒凡斬首萬餘級縣民逃亡十室而九存者數十戶耳沃壤荒蕪往往募獐人耕種獐日繁而剽掠滋甚宣宗宣德四年公竦餘

黨復構洛容諸蠻出劫指揮王綸縱兵剿之良民
多被屠戮山雲以聞上命逮治已而山雲上征柳
州蠻賊首功上謂尚書張本曰蠻寇害民譬之蠹
賊害稼不可不去然殺戮已甚朕實憫焉其令雲
善撫之且瘡痍之鄉損師勞費致變之由緣邊臣
綏馭乖方煩茲血刃奈何復以為功弘正以後寇
起多不上聞馬平三都五都結洛容獐嘯聚如故
柳州守劉璉率兵堵截賊敗走追至百里援兵不

至賊還戰剖璣腹實草焚其尸督臣匿之而諸蠻
益肆民田皆沒於獐縣官擁空籍而已

侯大狗

侯大狗大藤峽蠻也峽在潯州萬山中山有水名
府江發源柳慶至潯經象州永安修仁荔浦平樂
諸境夾江兩山峇崙截繫峽有藤大如斗延亘兩
崖勢如徒杠蠻衆蟻渡號大藤峽最險惡地尤高
陟巔則數百里外軍旅聚散往來歷歷在目諸蠻

倚為輿區桂平大宣鄉為前庭象州東鄉武宣北鄉為後戶藤縣五屯障其左貴縣龍山據其右峽北巖崗以百計最著者曰仙女關九層臺而南則牛腸大岫諸村緣江立寨其中為力山力山之險倍藤峽焉週遭六百餘里冥巖邃谷壁立千仞十步九折失足殞身中產猛人藍侯胡盤四姓自洪武間嘗出剽掠叅議楊敬恭官軍討不利永樂中復結桂平蠻為寇總兵韓觀請討不許宣德而

後數刦城邑總兵山雲擊斬其從黨千餘人正統
初更糾潯柳諸賊攻陷州郡山雲奏請撥田州等
府狼兵協剿誘擒蠻酋藍受貳等梟以徇而賊首
侯大狗遁去仍嘯聚倡亂修荔平樂諸蠻皆響應
守吏不能制率以招撫縻之而已英宗天順七年
大狗刦上林縣攻梧州城時總兵泰寧侯陳涇駐
兵城中會太監朱祥巡按吳璘副使周璫叅議陸
貞都指揮杜衡等方議調兵而賊夜駕梯踰城啓

門刦官庫放獄囚大掠城中執副使周璫為質殺
訓導任璩而涇等擁軍自衛不敢發一矢黎明賊
聲言毋動動即殺周副使涇等乃遣使與賊講解
晡時縱之出城既去縱璫還時官軍數千賊僅七
百耳自後奏報刦掠殺越城市無虛日總兵顏彪
都御史葉盛嘗與戰頗報斬獲及軍迴而賊復集
於是御史王朝遠編修丘濬俱條上兩廣用兵機
宜詔有能捕侯大狗予千金爵一級卒無應者兵

部尚書王竑奏言峽賊稱亂久矣皆由守臣以招撫為功致釀大患非大創不止也浙江叅政韓雍有文武才都督同知趙輔勇畧可任上乃拜雍為都御史輔為征蠻將軍以僉事和勇為遊擊太監盧康監軍事而一以便宜屬之雍憲宗成化元年雍集諸將議討賊方畧曰藤峽盤據要害而修仁荔浦為賊羽翼當先翦之乃兼程趣桂林以漢土兵十六萬人破修仁窮追至力山大敗之斬俘凡

八千五百有奇師次潯州延父老問計皆曰藤峽
天險一夫守隘千人莫當莫若屯守以待其敝雍
曰峽山遼濶六百里安可圍也夫師老則氣惰賊
且睥睨衝突猝難悉防兵法有先聲奪人之勢我
軍既破府江賊已喪魄乘勝而取何堅不克乃署
其部為左右軍右軍以六萬八千人分五哨攻其
北左軍以九萬二千人分八道攻其南而自與趙
輔和勇開府於高振嶺以督諸軍十二月朔諸道

并發賊大懼置婦女積聚於桂州橫石寺塘據險
堅壁守而悉力出捍挾鏢鎗藥鏃下如雨注雍督
戰益急官軍用團牌扒山虎等器仗魚貫以進皆
殊死戰呼聲裂山谷賊氣奪歷破山南石門大信
道袍屋厦紫荆竹踏梁腦老鼠林峒沙田古營牛
腸大岵等寨焚其屋廬積聚賊既奔潰督兵追躡
伐山通道賊皆上九層崖抗戰立大柵數重置千
觔礮石從絕頂而下弩矢交發不可當雍誘使拋

擲幾盡別遣人從間道登絕頂舉炮賊大驚雍麾
死士以大斧刊木扳蘿而升前後不絕如蟻漫山
奮擊然後發火箭焚柵遂生擒侯大猷並其酋目
七百八十餘人斬首三千二百七級獲賊屬婦子
二千七百一十八人餘戰溺死者無算磨崖石紀
歲月而還土人謂自國初用兵未有窮巢破賊如
此甚者於是斬峽藤斷之更名曰斷藤峽所斷藤
幹老而中空截其兩端蒙以牛皮作大鼓置軍門

蓬蓬然聲聞十餘里其後移於兵備行臺扣之無聲歸即如舊以為神是役也輔知雍才軍事一聽雍節制而身自督戰故所向有功捷聞上降敕褒嘉命雍輔等議善後策雍言諸徭之性憚見官吏驟攝流官終致畔離請復上隆土州岑鐸職更多置土巡檢移駐要害以所部土人李昇等領之設千戶所以李慶等領之而疏薦從征將士孫震等宜加擢用上俱允納自是潯州之民始獲寧宇云

侯公丁

斷藤賊自韓雍平後武宗正德間稍有橫江禦人者峽以南尤甚都御史陳金曰諸蠻所嗜者魚鹽耳可委而啗也乃令商船入峽載魚鹽諸蠻就水澣受去如稅權然江道稍疏金自以為功疏其事請名曰永通峽久之蠻征商無厭稍不愜輒掠殺之必賂乃免潯人為之語曰昔永通今求通求不獲葬江中誰其作者噫陳公世宗嘉靖五年總制

王守仁平思田土州亂還至潯江峽賊皆遁乃密署部伍四面夾攻賊走險負固不出官兵攀木緣崖遍搜山峒擒斬一千餘名峽南復平已而守仁還峽以北賊時復出猖獗十五年春蠻酋侯勝海者侯大狗之族也會武靖州土目黃貴韋香與勝海爭田愬之指揮潘翰臣誘殺勝海勝海弟曰公丁糾黨噪城下殺廂民二人去僉事鄔閔叅議孫繼祖馳報都御史潘旦請討叅將沈希儀以為宜

需春江漲順流下乃可破賊不聽遂以千人往擊賊遁斬一病矜還漫言賊退請置堡堡成即以黃貴韋香帥三百人戍之於是諸猛大恚公丁鳩衆得二千人夜寇堡戍卒死者二百人貴香走免事聞詔罷閱與繼祖而以侍郎蔡經代旦十六年經與安遠侯柳珣副使翁萬達決策發兵萬達廉得百戶許雄素通賊狀詰之雄懼請効力自贖萬達佯庇公丁捕繫訟公丁者數人公丁果遣人自列

萬達許諾更令雄假稱貸為賄公丁喜益信雄會
萬達巡他郡乃以事密屬叅議田汝成汝成召雄
給公丁自詣白事且令誠之曰寇由諸徭無與汝
事幸勿以兵自隨則不汝疑也公丁至汝成陽為
勞遣而陰令廂民被殺者家出毆公丁譁於市遂
逮毆者及公丁并繫獄遣雄諭其黨曰廂民言寇
堡由公丁而公丁諉罪若等如公丁言將窮剿若
屬不則獨坐首禍者毋以一公丁苦諸徭為也諸

徭皆爭言公丁倡亂請共棄之乃出之獄而磔於市十七年冬汝成言於督府謂首惡既除急議鵬剿失此不討實非長策許之遂以副總兵張經將左軍翁萬達監之以都指揮高乾將右軍梁廷振監之十二年二月左軍三萬五千人分六道攻紫荊石門梅嶺諸巢右軍萬六千人分四道攻碧灘羅淶上中下崗諸巢南北夾擊賊大窘遂擁衆走林崗而東王良輔邀擊之中斷復西奔諸軍合擊

斬千二百級時生擒黠桀者數人鞠之對曰往年
據險結砦官兵圍剿無孑遺者今不復立砦惟漫
走山谷間令官兵疲於追逐曠日持久費餽饟則
當自退耳萬達等乃益分兵沿江繞出賊背盡發
諸賊隘所設蒺藜簽及礮石滾木等物追斬數
百級於是藤峽賊殆盡萬達汝成獻議督府凡七
事曰編保甲以置新民立營堡以通江道設備禦
以控上游清狼田以正疆界改州治以建屯所處

款兵以慎邊防榷商稅以資公費督撫多採納行之

韋銀豹

韋銀豹桂林古田獐也獐種甚繁其最強者曰韋
曰閉曰白而皆并於韋景泰間韋朝威據古田縣
官竄會城遣典史入縣撫諭烹食之弘治間大征
殺副總兵馬俊叅議馬鏐正德初再征殺通判知
縣指揮等官嘉靖初又再征殺指揮舒松等時銀
豹與其從父朝猛攻陷洛容縣還據古田分其地

為上下六里銀豹出掠惟下六里人從行而上六里不與焉嘉靖四十五年提督吳桂芳因其間遣典史廖元入上六里撫諭之諸獍復業者二十人銀豹度勢孤請降桂芳乃奏言古田自弘正來知縣未嘗入城今典史廖元能撫賊有功宜量陞主簿而徐擢為縣且本省總兵止以都指揮統之不兼制柳慶權輕位下凡事輒為撫夷道所持今諸獍雖納款犬豕之性難保其終莫若稍重將權

別選材勇堪任者居之部議加都督銜兼制柳慶
廖元陞擢皆如議而銀豹愈猖獗嘗挾其五子據
鳳凰連水二寨襲殺漳平知縣魏文瑞更自永福
入桂林刦布政司庫銀四萬餘兩金珠若干殺署
事叅政黎民衷縋城而去官軍追不及久之臨桂
永福各縣兵羣起捕賊始得賊黨扶嫩土婆顯等
三十餘人於各山寨中然首惡未獲也隆慶三年
朝議以廣西專設巡撫推江西按察殷正茂以僉

都往正茂至奏請剿賊合土漢兵十萬集衆會議
時八寨助逆衆議先剿敕書亦原有先平八寨徐
圖古田之語正茂獨不可謂兵法攻瑕者堅況首
從自分不見上六里已事乎先給榜諭八寨八寨
聽命然後分兵七哨以總兵俞大猷統之而使副
總兵門崇文叅將王世科黃應甲都司董龍魯國
賢遊擊丁山等各領一哨布政郭應聘與副使邵
惟中為之監視乃令各哨所屬復分土兵為二隊

更番清道必先清數里而後行數里及至信地則
合營而攻之步伍嚴整生擒朝猛梟於軍陣斬七
千四百六十餘級俘獲男女一千餘口撫其不為
寇者六百六十餘村銀豹窮蹙陰覓肯已者斬首
以獻時主簿廖元把總王綱認之以為是相與証
明捷聞既而稍稍傳銀豹不死正茂令僉事金柱
蹤跡之銀豹兄銀站乃生縛銀豹并其子扶枝膠
致戲下正茂乃疏請引罪以檻車獻俘正法古田

悉平因并八寨與龍哈唏咳為十寨立長官司并
設守備練兵坐鎮守禦以黃昌等為之而敕蕭紳
陸雲騰充土舍名目聽守禦調度更陞古田縣為
永寧州

韋金田

嘉靖二十四年馬平獍韋金田作亂占據水陸二
路都御史張岳檄總兵陳圭調漢土兵七萬討之
攻拔雷巖平田同良落滿等寨進圍魚窩巢魚窩

石壁削立拔地數千丈四周傾仄不可置足山頂
繩懸礪石兵一臨寨飛石交擊我軍進而輒却諸
將以為難岳曰魚窩不破即他寨破無為也督攻
愈力賊悉衆固守晝夜不徹岳佯令解圍寨中賊
稍遁去於是移鎮柳城召諸將授方畧皆曰不如
罷兵徐圖岳度諸將不足與計事乃召副總兵程
鑒令選精銳備親軍鑒選三千餘人請所用岳曰
吾欲得死士任吾指揮死且優卹其家於是願從

者七十人屬鑒刳寨鑒有難色岳顧左右酌酒灑地誓必滅賊出袖中二紙示之曰此吾疏草也寨破薦爾首功不破則爾養寇為首罪惟君所擇耳鑒泣曰願為公死時賊巢苦乏水每日瓶水計口而分一日五賊守險逕爭飲奪瓶瓶覆皆大喧欲散去比夜堅卧不巡警而鑒將七十人至寨下未敢發也先令五死士揉木而上五賊熟睡弗覺因斬之代為巡警而召六十五人者冒險夜登聲喧

寨中賊大驚併力出戰山下兵復乘之砲刃交發
遂破魚窩韋金田及其衆皆自焚死俘斬凡四千
餘級撫戢其餘黨而還

楊公滿

楊公滿平樂府江苗長也府江有兩岸三峯諸獐
上接灘水下達蒼梧綿亘千有餘里巖險灘湧諸
獐依憑出沒剽掠東岸連富賀抵恭城西岸連修
荔抵永安而三峯上下中大小凡七十三巢互為

羽翼其最強者通藤峽縱橫郡邑間穆宗隆慶初
公滿與其黨公奉公東等攻荔浦城破莫大家等
堡及平樂峰門源諸村復圍永安州執知州楊惟
執掠其印邀厚贖始得出兵民屠戮無算當是時
道途梗塞城門晝閉永安修荔幾至陸沉庚午古
田師興議者曰府江兩粵咽喉患與古田等宜借
兵威并及之都御史殷正茂是其議迨師旋則春
深水漲兵不可舉而彪灘龍頭磯諸賊益肆殺指

揮胡潮千戶李可久周濂土舍岑文諸傷人寇貨
狀不可枚舉事聞兵備副使陳其樂坐貶官是秋
正茂遷總督郭應聘代巡撫事正茂過府江嘆曰
蠢爾異類所謂仁弗能懷威弗能讐者也乃與應
聘決計討之會疏上言惟粵西蠻獠所在充斥頃
古田既復國威大伸諸夷稍知斂戢惟是府江兩
岸三峯賊之淵藪不盡根株且為後患用宜乘勝
剿除部議報可乃徵漢土官兵六萬以六年十月

水陸分為四哨擒斬賊首楊公滿及其屬五千一百有奇俘獲四千餘名牛馬器仗稱是神宗萬厯元年春師還文武軍吏士陞賞各有差役凡三閱月費餉僅二萬計事平應聘疏善後策凡六事俱如議行

善後諸策
詳見藝文

廖金濫

廖金濫者陽朔永寧里獐也朔山多崇岡複嶺而永寧里為最有莊頭鬼仔石嶷擂鼓碎江諸巢西

連永福之理定邊山海灣黃源五斗諸隘而荔浦
接其南古田倚其北為府江要會古田之亂金濫
乘隙剽掠入縣城殺知縣張士毅執百戶曹恩刳
帑金以去時都御史應橧謀於兵備茅坤設計剿
平之金濫亡命走荔浦居南源隆慶五年古田賊
平未幾餘黨韋狼要復嘯聚金濫糾衆起南源應
之攻土舍莫棟營襲古西巖口進據山灣而金馬
沙田三崗賊酋周公樓王公來楊元倡楊立昌等

皆附焉萬厯元年冬都御史郭應聘檄副使莊國
貞叅將王承恩王瑞指揮徐明千戶張世勲等調
向武都康田州兵萬人擊捕承恩曰山灣永安障
蔽也今為賊據是未與人鬪而先斷吾右臂永一
失漫延賀昭則府江危矣急引兵分道并進遂破
山灣誘擒韋狼要奪復峰門下南源又破榕岡諸
賊周公樓楊立昌等皆詣降而金濫夜遁入大水
田堡收殘衆得千人更為保聚結永福邊山理定

及洛斗托定賊襲殺洛容尉會懷遠諸徭叛勢尤
張應聘召總兵李錫叅將王世科等集議將督師
大征而分兵萬人戍陽永府江叅政吳一介曰陽
永密邇省地輟西師以事此固不可然緩之亦非
計今賊聞主帥西行必不吾備誠假一介精銳數
千便宜剿之一鼓可滅也應聘許諾竟予兵萬人
聽一介調發乃先事陽朔一介盡撤諸戍兵簡較
閱月為持久狀因而得死士二千五百人次者亦

二千五百人又次二千人再次者二千二百人羸弱者乃八百人先以弱卒治軍裝齎糧由常安抵板橋驛望懷遠進發而密以死士分五哨間道銜枚束甲趨雞籠雷公白馬江口龍口等巢皆披蘿陟磴而升搗其穴以其次分三道由紅蓮鳳凰遇龍等堡扼其險以其又次分四隊由刁山芒隘白面暗源諸村聲其援更以其再次抵馬蹄涼亭楓木德勝各隘防其逸部署既定以三年八月朔日

起事方是時賊方寇洛容偵官軍往懷遠者繹絡
於道而意陽永棄弗問也韋銀花謂金濫曰夫官
軍戍府江號萬人今聞盡撤而西而行者皆老稚
不足千人其他安往乎陽朔碎江諸巢吾之腹心
而金寶咽喉也萬一失守奈何金濫貪而少謀曰
吾得融洛則北可以援懷遠而東足以翼古田何
慮朔也已而洛容諸村寨老併力拒賊圍十餘日
不下金濫乃稍稍復走大水田堡甫及界牌各道

兵火銃皆發三面遮擊賊驚疾馳奔金寶堡而四
隊兵齊會戲下匝遶數重金濫大駭謂銀花曰官
軍得吾寨乎悔不用若言乃為所賣因與其屬八
千餘人衝突而前殊死戰揮鏢奮擊我軍為却者
三而五哨兵則已乘虛盡破碎江右隘巖塘涼境
廟門猺山諸巢火其廬俘獲老少婦女一千二百
五十有奇哀號振山谷金濫亦泣遂與其屬廖金
蓋金線韋狼化銀花等皆就擒乃悉梟以徇三軍

餘黨俘獲殆盡

潘積善

神宗萬厯三年潘積善自稱平天王積善岑溪蠻酋也岑之西北曰上下七山有平田黎崗白板等三十七巢東南曰六十三山有孔亮陀田桑園古攬等百餘巢與粵東羅旁相聯絡賊據峻嶺高可摩天望我軍如燭照數計山徑周遭僅容側足賊上下若走丸或伏藥弩中人立斃我軍望之輒次

且而却弘治嘉靖間數征不克賊謂官有萬兵我有萬山兵來我去兵去我還二百年來未有搗其虛者時粵東羅旁賊方熾積善實為羽翼橫江截人益鴟張督臣凌雲翼發兩粵勁卒凡十餘萬盡平羅旁地且移師臨六十三山六山七山諸徭而先以檄曉譬積善積善懼且喜願歸田輸賦得比編戶納器甲數百事雲翼令岑溪知縣葉詩馳積善所積善繫組單騎為嚮導遍歷谿崗覈其田皆

實然後詣軍門降於是諸徭斂戢因立五大營曰
大尚連城北科平河六雲等鎮以其酋目韋月領
耕兵三百名教之耕守而統以叅將指揮千百戶
焉時募兵三千人皆廣東勁卒頗驕恣諸營偏裨
與縣官爭道返攻縣治事聞戮其首惡九人乃議
罷客兵用土著土著皆田家子也岑人故脆弱不
習擊刺所守營汎距其家數百武而近往往潛回
不肯直宿壘則星列兵則鳥散存空籍而已而叅

將吳顯忠時腹削諸偏裨偏裨索之部伍部伍多
謝退或亡去二十三年冬大侵粵東浪賊數百潛
入七山謂岑無備禦誘諸徭刦掠是時積善死諸
徭有所與讎者曰乾廂村撞人嘗占奪徭人欲甘
心焉浪賊曰請為若復讎乃先以數人偽作材官
持官文書往投叅府者會薄暮入乾廂而假宿焉
撞人弗疑且飲食之夜半諸浪賊四起內外交攻
盡殺撞人屠其村而去於是乘勢遂反剽掠旁村

邑殺獐目韋月燬大崗叅將府民一日四五驚縣
官告急督臣陳大科檄調兩粵漢土兵凡萬八千
人以總兵童元鎮侯國弼叅將吳廣李鳳守備黃
鐘等分路進剿賊伐大木塞道環布箠簽我軍佯
督諸役開道而陰從間道登孔亮山賊據高悉力
以拒弩矢迅發我軍將前而却叅將吳廣斬一卒
以徇諸兵大奮火銃齊發賊扶傷走諸將分道追
之所至披靡初賊謂六十三山王師所不加不虞

今日之涉其地也遂大潰窮追至車灘溺死者無算遂大破之斬賊首一千一百三級俘獲四百有奇撫其餘黨八百餘人乃班師還因從兵備張文耀議刊山開道募戍卒置汎守諸善後策次第舉矣

韋朝義

韋朝義者韋狼要餘黨也狼要被執朝義竄上油崗尋入洛容與洛斗托定諸獍覃金鉢覃明威陶狼金羅顯陽等深相結納謀出剽掠而未敢發萬

歷初知縣邵廷臣議築洛容城於白龍巖未果以
憂去縣尉謝漳行縣事適土商販瓢入獐村獐爭
取之日久未償值商以愬漳漳執二獐杖而繫之
諸獐大恚會上元夜漳單騎出遊遇朝義勿避從
者叱之朝義欺其人寡約諸獐曰此可禽也跡之
至城城僅六丈許居民數十戶乃從隙垣緣入得
前所繫二獐釋之直趨漳所遂殺漳掠其印而出
於是糾黨嘯聚報聞都御史郭應聘集諸司議皆

曰急發兵詣洛容副使沈子木曰洛容之變上油
尙賊實根抵置此弗問是舍本而齊末也急擊勿
失應聘然之遂調總兵李錫移師趨洛容而遣指
揮楊照分兵攻上油約期並舉錫兵連破托定洛
斗古龍黃塘諸巢擒斬賊黨覃明威羅顯陽等共
六百四十有奇而朝義果遁上油照既至麾各路
兵夾擊連破板橋姚尙青烏黃泥常安滿巖諸巢
賊潰走盡匿里廂下良山澗中里廂下良共一山

長數里為上油之障中有大潭我兵緣石磴捫蘿而上復乘竹筏渡潭則窅谷冥巖非持炬不能一移足賊從暗中見火光即矢石交下諸軍相顧駭愕子木與照先令作長炬數千載竹筏選敢死士出賊不意於黑處乘筏架梯緣巖而上炬皆插山巔以受矢石矢石且盡而炬照耀如晝賊驚走倉皇投潭中溺死無算遂掩擊大破之裨將文俊獲朝義朝義乞命請自効貸死不許遂斬之及其屬

韋混皇覃三官覃金鉢覃金倒陶狼金等悉梟以
徇凡斬俘二千八百三十有奇書籍五冊縣印一
顆捷上自殷正茂以下詔賜各有差

隆扶羊

隆扶羊懷遠蠻酋也懷居右江上游界連黔楚故
為夷落隆慶中古田大捷知縣馬希武乘間請城
縣報可乃召獠老加仲才諭之且約以金日擊牛
酒為犒久之城工及半諸獠請牛酒弗與因以令

為食言皆怏怏已而諸徭易米至城下諸役夫曰
以若等先時攻破城乃勞我築即城成必盡殺若
等諸徭疑之希武曰城成非大壯漢官儀無以彈
壓乃徵戍兵數十騎為衛士出入偕鼓吹節旄諸
徭益駭愕稍稍謀叛於是隆扶羊集諸徭計曰父
老苦令興築久矣今前已欺我今更厲兵秣馬其
意叵測且築城則募官兵置戍守異時鞭箠使我
奪吾田索我餉不者誘而屠吾屬矣吾聞先發制

人後發為人所制莫如殺令求賢有恩者共輔毋
徒為所魚肉也諸徭猶豫不決會希武巡城怒徭
人執而笞之斃杖下徭弗能堪乃大譟而起共推
扶羊為寨主糾衆得千餘人露齒瞋目環攻希武
希武與經歷余冕縣尉陸錦等出禦敵皆被殺督
臣殷正茂請剿遣總兵李錫叅將王世科統官兵
會常安鎮扶羊乃治舳艫百餘艘入石碁傘頭諸
村村人與戰於平琴洲扶羊敗奔列柵堅壁以拒

錫等兵次板江會大雨雪我兵水行則逆流陸行
則猿徑崎嶇險不可陟屯月餘不進扶羊聲言阿
猺但守家漢當奈我何忽村人朱萬世得縣印來
獻願為嚮導且曰諸猺獨畏永順鈎刀手及狼兵
耳正茂乃羽書移楚黔及浙徵鈎刀手三千鳥銃
手五千狼兵十萬而撫臣郭應聘先已遣使招白
果黃土大梅青旗諸猺皆歸降錫等會各道兵鼓
行而進連拔丹陽焦花等二十餘巢斬其黨賊吳

金田榮才富等賊棄旗遁追至大稂天鵝二嶺更
破七團四寨生擒扶羊及其酋王伯牛爺等械軍
門伏法奪獲風紀輯覽諸書鶴頂榆木黑花帶皮
印囊諸物前後捕斬凡三千餘俘獲男婦及牛馬
無算捷聞議設兵立萬石宜良丹陽三土巡司防守

韋王朋

韋王朋者馬平獐也先是平馬平時因建營堡使
土舍韋志隆提兵往屯其地王朋視堡兵如仇讎

常率東歐大產諸酋要挾營堡分守彭應時兵備
周浩使千總往撫竟殺千總會縣官度田王朋復
無忌反為阻撓甚至白晝劫村落官軍相視不敢
捕萬厯八年總兵王尚文請於制撫劉堯誨郭應
聘統兵攻剿大斬獲盡俘其男女牛馬器械而後
返初馬平獍常請鄉大夫之託以佃丁莊戶浮沉
間閭而鄉大夫亦親入寨崗交錢財課租責息出
入縣庭以致生變至是兵部尚書梁夢龍請著為

令令監門各立門籍加譏察所與犺獍通因而致富者即以其財產沒官詔可之

嚴秀珠

嚴秀珠懷集獍也少時任俠使酒殺人報讎里中諸健兒高雁高庫等嘗與把總羅定朝博博不勝索貲急以告秀珠秀珠為鬻田宅盡給之賀縣羊橋賊楊乳與李用生盜牛用生亡匿懷集百戶朱裳所為傭保而乳被逮鞠之得實乳引捕者跡至

裳家裳出用生就繫秀珠曰人以窮感來歸奈何
出之且乳非用生友也追而格殺乳及捕者縱用
生逸去還乃並殺裳久之秀珠更失牛為封川寧
崗賊所竊知為秀珠牛謝過請還秀珠義而釋之
既去復為開建蔡村賊所奪秀珠乃擊鮮造釀聚
黨數百人走蔡村掠其耕牛二十五頭殺九人擄
七人還是時懷集有金鵝松栢龍塘埔七諸酋皆
慕秀珠義推為渠長凡據十五寨周匝二百餘里

公行剽劫居民苦之萬厯初懷集令林春茂開建
知縣范調元蒼梧知縣李曰巽守巡管大勲來經
濟等會牒報聞都御史吳善檄總兵戚繼光呼良
朋徵漢土兵二萬五千人分為五道一出伏虎營
一出蘭崗山一出石牛營一出仇崗營一出會珠
營期以二月二日並舉連破金鵝松栢古城深埗
水細大灣等共六十餘巢擒斬秀珠其屬韋胡通
黃遂梁韋亞養謝生歐福正歐世奇等凡二百四

人皆自殺懷集平於是銅鐘牛欄丁口約數百人
俱踵懷集縣庭中叩頭言諸偷中傷死及殺戮無
算我等故良家子願充戍伍比編戶事聞詔餘黨
悉貸誅論功賞諸將士而安輯各寨復業者二千
八百餘家初逸賊李用生久匿羊橋崗不出至是
峒老識之亦縛獻軍門梟示無有逸者

黃朝田

黃朝田北陀撫犢也萬厯二十六年副使林廷陞

出巡適把總曾唯與朝田有隙中以蜚語遂下朝
田于獄其部落數十人率中懷不安遂鼓譟圍城
越月而桐亮徭盤花婆乘機寇龍塘營擄指揮朱
元慶家口又越月而橫溪石狗等徭唐則婆寇平
西下陂殺生員莫汝賢等十餘人擄掠人畜無算
指揮張懋功死之亡何荔浦賊首韋扶仲復糾大
小兩江賊攻陷下崗土司城于是平邑之巖頭徭
恭城之站面徭各乘釁倡亂流劫郡邑推官江中

楠署府事擁孤城竭力防禦七月巡撫戴燿移鎮
平樂調漢土官兵六萬人以都督僉事童元鎮為
總統孟宗文侯國弼李應陽為副率叅將楊元都
司甘霖遊擊郭酉科統兵六萬分道並進復擡叅
政陸長庚叅議朱東光監軍督餉首克北陀九冲
府江一帶次破站面嶺初巖頭諸賊恃站面為天
險據以抗燿命諸將以所製火器攻之賊衆舉潰
散時韋扶仲猶岨拒燿用長庚議佯緩師以示懈

而密令元鎮夜率兵攻白馬冲獲扶仲孥蓄旋伏
兵誘扶仲出刼并就擒先後共斬首二千餘級諸
賊悉平乃議北陀設撫夷同知又募東兵千餘分
戍本城及田冲修荔要地疏上從之

八排

八排延袤二十餘里而軍寮油嶺界於其中勢若
長蛇首尾相應內五排隸連山縣離城僅五六里
可望而見一曰大掌嶺一曰火燒坪一曰里八崗

一曰馬箭一曰軍寮獨軍寮強悍兼高紫流寇竄
入千人為其羽翼連山縣內七崗鄉民宜善司外
七崗獍民皆五排蠶食之地西抵賀縣昭平富川
南抵懷集北抵湖廣之藍山縣錦田所皆五排流
劫之地外三排隸連州離城三十里一曰油嶺一
曰行牆又曰南岡一曰橫坑獨油嶺強悍楚寇竄入
亦繁有徒獍山背抵陽山縣蕭陀白芒一帶皆三排
蠶食之地南抵懷集東南至清遠北至連州通星子

司西抵湖廣臨武達宜章界乳源皆三排流刳之地

十寨

十寨舊稱八寨曰思吉周安古卯古蓬古鉢都者
羅墨剝丁後益以龍哈唏咳為十其地東接柳州
西連東蘭南界思恩北抵慶遠周環五百里故遷
江八所屯及上林三里民地賊寨各千餘人四山
環合共據一險鷙悍難制嘉靖七年新建伯王守

仁討思田以降賊盧蘇王受願自効遂潛師分道
進擣八寨諸巢破石門賊始驚覺大奔潰乘勢追
躡俘斬二千餘級因議移衛置寨未果而守仁卒
賊猖獗如初隆慶四年都御史殷正茂征古田賈
人蕭紳久販十寨中知地利正茂購之令賫文往
諭諸蠻願輸賦為編民遂議置長官司巡檢以黃
暘韋觀黃昌領兵分守諸蠻稍戢萬厯二年龍哈
獠樊尚復糾黨為亂撫臣郭應聘密令黃暘等襲

尚斬之已而黃昌貪淫失衆心應聘暴昌罪按如
律由是土司寢弱不振諸蠻益恣攻逐黃暘子如
金占其地剗馬長弩橫行四出七年督臣劉堯誨
撫臣張任請征之調土漢兵十萬分道並進直搗
諸巢賊俱披靡又以北五諸聚落習與賊通移師
破之共擒斬九千一百三級俘獲無算捷聞陞賞
有差堯誨與任上善後事宜一曰設三鎮以重彈
壓二曰屯三里以樹聲援三曰分信地以重責成

四曰遷衛所以振武威五曰議屯田以示優恤六
曰開道路以通險阻七曰議錢糧以裕經費制曰
可會張任卒復起郭應聘於家應聘至乃議分八
寨為三鎮仍使土官族目韋應鰲韋顯能黃馮各
授巡檢部兵千人戍之而以思恩叅將統焉建叅
將署於三里龍哈哂咳各募兵立堡又遷南丹衛
以實邊地遠近砮置隱然一長城矣

八寨善後諸
策詳藝文

本朝馭蠻

洪惟我

朝膺圖受歷以來海宇澄清蠻疆服化生齒安恬太
平休養之風超越前古矣顧苗性獷悍間有小梗
草薶禽獮毋使蔓延孳畜以滋害種者可畧敘次
以彰馭蠻善術焉粵西自順治初年

王師下桂梧追由榔入安籠既平李定國諸猺獞土
酋咸望風懾服康熙三年恭城縣伸家猺賊目黃
天貴姪黃公輔踞叢木寨聚衆剽掠村民重罹其

害知縣張泰階之任察賊勢流毒狀具詳總督屈
盡美移咨湖廣廣東分三路進剿親率本省兵由
勢江源入掃蕩賊巢天貴公輔就擒十三年孫延
齡叛從吳逆梧州都司王邦相潛通款於延齡據
潯州招結土賊陳士龍周君道李梅友等聚衆抄
畧五山狼目韋國棟陷岑溪掠戎墟藤縣賊林萬
勝據義昌鄉殺解餉官其時諸州邑雖騷然而義
師迭倡上藉

國威奮揚旋皆鋤滅吳逆平偽將王明遁匿古州八
萬蠻地俘斬其黨邵化龍等二十三年容縣鬱林
賊崔玉枝賴晚作亂總督吳興祚檄梧州副將朱
起龍剿平之三十八年王明復造偽劄煽惑夷衆
散布滇黔楚粵柳慶協弁潛入古州擒明送長沙
棄市事遂解四十一年八排猺殺廣東三江口副
將

朝命東軍進討而地界懷集富賀間廣西提督張旺

以兵進扼宜善司蓮花汛各隘猺懼伏罪五十三
年都結土州革目農几咸與萬承構釁糾集猺衆
韋佩李良等於多禮諸村佔奪人畜迫近州城新
太叅將王起雲馳赴剿斬猺黨十數人餘賊退屯
山谷間起雲復率兵搜圍几咸等意其兵出萬承
合衆援擊起雲與土目許鴻綱等俱被害已而知
誤傷官兵衆驚潰被殺及自淹死者二百餘獲首
亂者寘之法遂定

皇上雍正元年雒容縣東塘獐為盜窟巡撫孔毓珣署
提督過雒容遣將討之開路設驛以成坦道三年
修仁縣十排獐糾衆焚掠總督孔毓珣巡撫李紱
檄剿擒賊魁寘諸法脅從而逃匿者招復業并酌
於三排木料各要隘設塘汛守哨相望天河縣福
祿里上中下三疇獐所居山崗險隘賊酋覃貴
翁與莫東旺等高藏煽誘宵小聞聲依附抄掠殆
無虛日督撫提咨商檄剿慶遠知府徐嘉賓設謀

遣謀調撥土兵擒獲莫東旺父子及兇黨十數人
餘皆開予自新獍賊斂跡六年西隆八達寨崇山
峻嶺獍苗錯居土目倚恃為奸顏光色顏光東等
勾合匪類蘇文斌攻刦流熾至是復統衆千餘借
送黨目岑顛岑扭歸寨為名連破弄忙之者莫者
岡狹東弄匣普馱之西宜各寨督提會咨征剿總
兵段宗岳屯師八陽下嶺賊憑險抗敵閱數月未
下巡撫金鉷復咨商督提檄平樂副將胡灝平樂

知府胡醇仁帶領弁兵協助提督田畯安寵總兵
蔡成貴先奉督檄分兵會剿於是俱赴軍前益兵
三路督攻土民抱金等畏罪倒戈斬光色光東首
級出獻其餘顏賊黨羽負固藏匿大兵連戰克捷
夜復縱火焚破賊巢八達蕩平設遊擊與西隆州
同駐於八達八陽二寨間設營扼守七年上林縣
之東西二撫即八寨餘孽前明王守仁平思田後
潛師討破六寨而撫其二寨置其人於順業里之

東西岸故謂之東西二撫民多頑獷其六便村尙
蠻樊匡料樊李王者尤為西撫積惡肆行刦掠附
近莊民並罹其害巡撫金鉞提督張溥商檄官弁
剿捕攻破賊巢鎗死匡料於淶村山崖村民鬻分
其肉古零土司與上林壤錯樊賊素相勾引及勢
迫遂展轉兔逸於弄六窮蟲各巢險賓州知州王
璵於龍霸地方計獲樊李王樊國珣等解讞兩撫
以安八年馬平三都之里高皂嶺曹顏都樂四堡

錢糧舊於遷江徵納即遇仇刦命盜刁匪往往兩
地竄匿遲延抗玩柳州知府錢元昌廉悉其情具
請巡撫金鉷檄堡目韋光夏黃振等諭宥前罪自
出首服報吐欺隱糧數割歸馬平額徵三都安輯
宜山縣之南北西三巢及龍門等處最為險隘猺
獠每出剽掠知府徐嘉賓訪擒魁惡藍明寬藍朝
若等殲之又請調南丹那地東蘭三土州土兵三
百名分守於德勝鎮添設巡檢弓兵兼移慶遠同

知駐轄龍門革去土舍亦增設巡檢互相緝防羅城縣通道鎮塘頭諸村延袤北界黔省西山古州夾山鳥道尙民藏險不出每為逋逃淵藪時議設營汛提督張溥遣叅將劉成往視見山巖險阻遽還請非發兵不可知府錢元昌力言兵一發即多擾且土蠻莫測官意將謂剿除勢必鋌而走險速之亂矣乃籌度情形密申巡撫金鉷開誠檄諭曉以禍福村獍黃光直黃發顯等初甚疑懼繼皆捧

檄感泣匍匐到官稱蠻等生處巖崙今幸為

聖世良民恩實再生率各崗頭人伐木斬竹起築營舍
甫半月告竣復以山徑陡窄凡近村應納秋米令
移輸通道兵防賴之寧明州屬之鄧橫寨路徑紆
盤深濠密竹田埂狀如魚脊可側足單行蠻賊狡
獍勾附雷蓬安馬那練江諸村寨出沒不時橫行
刦擄每隨招隨梗百餘年莫可誰何總督鄂爾泰
先後檄思恩副將尚清左江總兵齊元輔撥漢土

官兵三千餘名進剿遷延不克復委替右江總兵
蔡成貴總統一切軍務九年四月督兵攻破九甲
又遣土練暗入四甲沿寨舉火餘衆潰散竄入六
甲併力死拒官兵奮勇合攻六甲隨破擒斬叛惡
俘獲男婦無遺逆寨迺平非夫掉尾之魚遊於沸
釜愍不知死而自取屠滅者乎總之獍獠狼亢
暴接跡非由性殊亦緣習錮撫馭者識因勢利導
之宜惠威並飭一發即治一治必清勿以姑息養

奸勿使株連流毒殺以止殺其生實多若夫被仁風
於蠻錯不鄙夷其民而教先平日澤以詩書馴其桀
鰲將不惟橐弓戢矢千百年之邊徼安寧而宮牆絃
誦孝秀成風人人皆化為善良其在善長民者共颺
聖化也哉

舊志論曰蠻俗雖殊而大都尚鬼古稱要服惟要
約之耳漢武開西南而牂牁之蠻始通中國東京
時零陵長沙九真日南諸蠻嘯呼山海而蒼梧象

郡亦罹荼毒然稍更易郡守馭以恩威終無梗者
唐天寶中邊臣鮮于仲通等挑邊釁而西南諸蠻
騷然發動矣貞元中黃崗首領黃少卿者攻陷邕
管經畧使陽旻請兵捕擊徼幸有功沒傷疾疫死
者八九乾符中邕管節度使辛譚遣使持牛酒賚
美貨啖二峒首領與之通驩并遺其母衣服母賢
者也讓其子始罷兵宋時有儂智高之亂命狄青
為宣撫使督諸軍討之逾年乃平乾道間范成大

帥廣西以恩信結諸徭諸徭納狀云某等充山職
當鈐束家丁男持棒女把麻任從出入上有太陽
下有地宿不得對好翻非偷寒送煖上山同路下
水同船男兒帶刀同隨盜賊不用此款者並依山
例山例者殺戮也自是帥事一年徭無叛者明洪
武中命韓觀為桂林衛都指揮象州等處叛賊方
熾觀敗之掩而殲焉自是警報漸稀永樂初潯桂
柳蠻寇為亂特遣郎中徐子良齋勅撫安復業者

二百六十四戶而命韓觀討其不率者觀用師嚴明諸蠻震懼觀沒後繼之者為顧興祖時宜山諸賊攻剗州縣殺御史諸璞奪其印二年之間叛者四起興祖分兵敗之終不能制也自永樂間征安南歲徵發廣西從征健卒歿行間者相續有告急輒請徵召踐更卒不耐其水土又多物故於是營伍益弱宣德初富川忻城諸徭不靖旋討旋叛因勅都督山雲代興祖雲至申明號令大小十餘戰

皆以身先士卒其馭諸將尤嚴故每戰輒克諸蠻震懾自雲而後諸將官養安而已正統成化間兩江桂平諸處無日不被兵而藤峽尤劇梧潯郡邑被其蹂躪民幾為墟後因從廷臣議設總督開府梧州都御史韓雍特受推轂卒殲巨魁厥功爛焉然粵東西各有內官鎮守內臣與督臣勲臣更相持衡若鼎足然意見參商賢者無所施其才而愚者益與之為市報者未必功功者未必報而諸郡

益以多事矣嘉靖初田州煽亂起新建伯王守仁於家命總兩粵軍事守仁故尚奇畧赦田州罪不問而藉其力以破藤峽八寨諸巢穴遂令郡蠻少戢守仁去後賊益鴟張據古田入會城剽藩藏而奪之金文武大吏為其所戕後乃從廷臣議罷鎮守諸臣再罷勲臣而制府之權始重隆慶初以粵西多警增設巡撫自是督撫二臣各一乃心文臣協策武臣宣力古田府江以及十寨諸藪悉以次

蕩平

本朝定鼎數十年間卧鼓橐弓間有小醜旋即撲滅
籌西疆者當知輕重之所在矣

廣西通志卷九十五

欽定四庫全書

廣西通志卷九十六

諸蠻

安南附紀

安南國即古交趾書云宅南交王制南方曰蠻雕題交趾有不火食者矣漢初為南越地武帝置交

趾郡獻帝建安中改交州晉宋齊梁隋並因之唐

改安南都護府

安南之名始此

其地東距海西抵雲南老

擢宣慰司南抵占城北抵廣西思明憑祥凡置十
有二州山則佛跡勾漏江則龍門海潮而富良最
大夷獠雜處性輕悍以富為雄役屬貧弱其產多
魚鹽珠璣瑋瑁田膏腴一歲再熟女工機杼垂髮
文身好席坐盤足見尊貴膝行三拜為禮唐以後
頗襲中國冠帶尚文學設選舉其錄科以六藝分
校醫卜方伎伶人之屬皆典職焉唐亡莫能統一
梁貞明中土豪曲承美納款於末帝得授節度使

時南漢擅命嶺表伐承美執之併其地後為愛州
刺史楊延藝所據牙將吳昌岌復奪之傳其弟昌
文昌文死諸將爭立十二州大亂驩州刺史丁部
領率兵靖亂交人德之立為交州帥號大勝王署
其子璉為節度使宋太祖開寶初璉聞南漢平遣
使奉表內附命充安南都護八年入貢方物詔封
交趾郡王而交南遂棄為徼外矣璉死弟璿嗣尚
幼以大校黎桓輔政桓刦遷璿于別第尋廢之

氏丁

傳世共十一年太平興國初詔討安南桓上表言臣本蠻

酋寄命節旄璫有童心將墜堂構吏民屬臣用安
夷落拒而不受恐滋亂階今已權總軍府事請便
晉秩得備外藩上寢其奏不報王師既下分水陸
兩軍並進桓詐降誘戰前軍侯仁寶戰敗死之轉
運使許仲宣上其事遂班師已而桓畏復討乃貢
方物謝罪上以道遠難征因而撫焉淳化中詔加
桓檢校太保宋使至桓郊迎勒馬側身問皇帝無

恙受詔不拜張筵衣赭衣珠冠自歌行酒莫曉其
辭酒酣跣足持竿標魚每中一魚左右輒叫譟躍
舞以示箕踞不臣也嘗令人扛大蛇長數丈饋使
館又羈二虎以獻宋使皆却不受還報天子具言
航海入交夷動經歲月冒涉風濤多染癘疫且其
地炎蒸雖當嚴冬猶揮汗如雨注云至道元年交
人殺人挈其族屬數十人亡命投如昔鎮鎮將納
之桓怒縱海賊寇欽州上遣李若拙齎詔以玉帶

賜桓桓詞驚慢若拙稍以禮誅之乃稱謝願約勒所部毋擾邊真宗景德七年桓卒子龍鉞嗣為弟龍廷所弑其從兄明護率衆千人奔廉州乞討上曰幸亂而伐喪不可令厚給資糧慰遣之四年龍廷入貢遂得襲封龍廷年二十六殘暴國人不附大校李公蘊廢龍廷自立

黎桓傳世凡二十年

遣使奉貢上

以蠻獠不足責遂用桓故事封公蘊交趾王公蘊卒子德政嗣德政卒子日尊嗣仁宗嘉祐四年日

尊寇欽州五年寇邕州詔安撫使余靖討之日尊
上表待罪熙寧二年日尊表言占城國久闕貢臣
當親帥兵往討無何虜其王遂僭稱大越皇帝追
尊公蘊為太祖高皇帝改元寶象又改神武日尊
卒子乾德嗣熙寧八年入寇陷欽廉二州詔招討
使郭達討之官兵八萬疫死者什六僅得四州一
縣而還乾德乞修貢職去帝號還所掠州縣朝廷
以其僻在海隅不復較也乾德死子陽煥嗣陽煥

死子天祚嗣孝宗淳熙元年進封天祚為安南國

王自是安南始以名國天祚卒子龍翰嗣龍翰卒

子晃嗣晃昂卒無子其女昭聖主國事尋避位

於夫陳日照

李氏傳八世共二百二十二年

理宗淳祐二年詔封

日照為安南國王日照表請世襲傳位其子光昂

詔以日照為太王而光昂紹封元世祖平雲南遣

烏蘭哈達取交趾先以二使者往諭不返既而兵

抵安南日照竄海島得前所遣使者于獄中因屠

其城兵留九日疫作乃班師日照奉表請如宋故事賜封爵又乞三年一貢皆許之至元中帝方征占城乃諭以六事一親朝覲二遣子入侍三編徭役四助軍旅五輸糧饌六置達嚕噶齊以統之光曷言小國服順天朝干戈戢而不用士卒歸為民丁示無他圖未敢徵發至於地勢瀕海五穀鮮少常貢之外末由輸輓又微臣稟氣衰老常櫻疾病藐爾諸孤不耐水土必使遠赴天庭道路艱難徒

暴白骨且天朝既已愛護褒矜寵之王爵而又使達魯噶齊監臨之豈不貽笑於四國乎伏惟收回成命率厥舊典豈微臣之幸抑一國生靈之幸也於是六事俱不奉詔光弼卒子日烜不請命自立世祖召之稱疾不朝遣其叔遺愛代覲世祖怒封遺愛為王以兵千人送之就國安南不納遺愛懼亡去二十一年冬命鎮南王托歡平章阿爾哈雅征之日烜拒敵潰走僭號大越皇帝傳位其子日

燭自稱太上皇托歡等兵入安南日烜空其國航海而遁盛夏霖潦暴漲仍議班師二十三年日烜弟益稷率其妻子官屬來降又封益稷為安南王命托歡等率兵平定其國日烜及其子復走入海追襲不知所之久之糧盡乃挾益稷還而日烜分兵三十餘萬出女兒關以遏歸師托歡等偵知間道歸國日烜遣使謝罪尋卒子日燭奉表入貢詔諭入朝宥其前罪日燭不聽朝議大舉會世祖崩

成宗即位日燔遣使上表慰國哀並獻方物乃罷
征至大泰定間其世子日養日曠遣使奉表來朝
終元世率歲歲貢獻不絕明太祖定鼎日燐奉表
貢未及冊封而卒詔封其子日煜為安南國王居
頃之其伯叔明逼死日煜自立遣使奉表貢禮部
主客曾魯曰前王乃日煜今日叔明何也詰使者
得其實上聞却其貢不受七年叔明奉表謝罪請
以日煜弟日端嗣立而已居攝日端卒弟日煒嗣

二十一年叔明卒大校黎季犛幽其主日煒旋弑之而立叔明子日焜明年弑日焜而立其子顯未幾弑顯而立其幼子實立七日又弑之乃大殺陳氏宗室陳氏傳十二世共一百七十年季犛更姓名曰胡一元子蒼更名奎自謂舜裔胡公後改國號曰虞改元元聖成祖永樂二年詐為日焜表上言無子陳氏嗣絕甥胡奎為衆所推乞署國事許之俄而老嫗宣慰司奏陳天平避國亂來奔召見具言季犛篡弑

狀上憐之賜居第日給食飲會安南使至上出天
平示之使者識其故王孫也拜伏泣下上乃遣使
齎敕責奎諭迎天平復國不則舉兵加誅奎佯聽
請迎還乃命左右副都督黃中呂毅帥師送天平
歸國將至芹站道險伏發刦天平格殺之報聞上
大怒四年七月命成國公朱能為征蠻將軍新成
侯張輔西平侯沐晟都督柳升等為副尚書黃福
為叅贊將兵分道並進朱能病卒以輔佩其印師

至雞陵關會戰大破之又自江口造舟以進敗賊
於嘉林江連克東都西都賊焚宮室倉庫而遁輔
兵所過秋毫無犯傳檄輯撫於是三江宣洮等州
縣皆望風降師次富良江賊以海舟橫截江中立
柵抗拒輔乘柵未備躬督將士力戰賊不能支前
軍柳升以舟師遮擊賊大敗乘勝長驅得船數百
艘復引兵出海口生擒黎季犛父子及偽柱國胡
杜等黎氏支屬俘獲無餘安南悉平先是輔等受

命時令求立陳氏後至是官吏耆老數千人詣軍門言陳氏子孫黎賊殺戮已盡願復古郡縣輔具疏聞上從其請乃置交趾三司以呂毅黃中掌都指揮使黃福兼布政按察司事置交州北江諒江三江太原宣化建平新安建昌奉化清化鎮蠻諒山新平義安順化新華等十七府統四十七州一百五十四縣衛十所十三又於交廣分界立溫衛及隘留二守禦所軍隸廣西民屬交趾以相制馭

六年春班師上以秦漢以來之士宇陷於外夷者
四百四十六年一旦復入版圖布告天下羣臣奉
表稱賀輔等班師各進級賞賚有差是年安南殘
黨簡定糾衆作亂偽稱日南王朝命沐晟從雲南
征之戰於生厥河敗績廷議謂非輔不可七年命
輔會兵徃勦時簡定僭稱上皇更立陳季擴謂為
陳氏之後輔躬督戰艦進兵慈廉等州大破之生
擒賊首簡定而陳季擴率衆乞降明年輔班師未

幾季擴復嘯聚詔授輔前印往討賊聞輔至壘石
塞海口集鉅木立砦以抗輔督兵起石通舟攻拔
城堡搜山得伏賊盡斬之賊遁匿海島輔率舟師
衝洋徑抵其穴賊大駭曰天兵飛來也悉潰走更
驅巨象數十為前敵我軍望之皆却輔乃上馬以
鞭麾將士有後者斬引弓射落一象奴再發中象
鼻諸將賈勇而前飛鏃如雨象叫譟退奔乘勝逐
北賊自相蹂踐死者不可勝數於是季擴及妻子

皆就擒時十一年冬也十三年命輔以征蠻大將
軍鎮交趾十五年徵還以豐城侯李彬代輔中官
馬騏監之騏貪黷誅求吏民不勝其毒反者四起
十六年交趾清化府俄樂縣土巡檢黎利叛自稱
平定大王彬帥師討之不克叅政馮貴侯保分路
勦捕皆沒於賊仁宗即位命榮昌伯陳智代彬而
遣中官山壽往諭黎利赦其罪以為清化知府不
從都司方政與利戰敗指揮伍雲死焉智等進兵

至茶籠復敗績知府岑彭死之宣宗宣德元年智
免官更以成山侯王通討交趾尚書陳洽為叅謀
通不聽洽處置師至寧橋伏發戰敗洽亦死通奏
黎利猖獗是時張輔以病予告乃遣沐晟柳升復
往討賊保定伯梁銘右都督崔聚副之以尚書李
慶郎中史安陳鏞叅贊軍務晟將水軍升將陸軍
分路並進詔黃福仍掌布按二司事二年黎利攻
陷昌江城知府劉子輔守將李任中官馮智等俱

死之賊聞王師且至列柵拒守升督兵連破數砦
直抵鎮夷關頗輕敵有驕色李慶曰夫諸蠻之性
輕合而易散合則可攻散則難於跡捕吾大兵壓
境而賊柵甫集固且立拔獨關右諸山紆鬱幽險
吾虞其有伏也升曰不然夫猫之擊鼠也不窮其
伏而乘其出吾從大將軍輔征蠻披荆棘櫛沐風
雨者數矣覘賊情勢百變而莫知端倪及其既潰
窮追更無噍類此擊鼠之謂也今賊巢新破未有

所依乘勝推靡間不容髮何懼為乃自將前軍獨
與百餘騎先馳令軍中曰詰旦來會慶退語安鏞
等曰吾見其往而不返也越宿慶發病死是夕升
至倒馬坡迷失道渡橋橋折皆墮泥淖中賊兵四
起升身中數十創遂死黎明後隊進援不知升處
皆亂已而聞升已歿副軍崔聚急引兵西抵昌江
賊驅大象而前直奔聚軍軍潰聚被擒不屈亦死
安鏞皆自殺是時沐晟師次水尾造舟分哨而進

江流漲阻不得渡梁銘亦病卒於是陸軍二萬四千人盡沒西平祿欽等州及四峒皆陷於安南先是黎利遺書與王通請和詐言求立陳氏後罷兵通以其書達升升不啟封遣使馳奏行在鴻臚寺進黎利書上發視之稱故安南國王嫡孫臣陳暲昧死上言陳氏安南勲戚受命封藩自宋以來修貢不懈十有餘世矣遭被亂賊夷為俘虜天朝伐罪弔民憐其無主代之置吏伏自臣竄身老櫓蓋

二十年丘墓所依時繫心腑故國耆老戀臣殷切
乞循太宗皇帝繼絕之明詔使陳氏滅而復續以
謐邊境先臣之靈中國要荒實圖賴之上以示羣
臣少保張輔曰太宗經畧數年得此土一旦棄之
無名徒以示弱且此表出黎利之譎當益發兵誅
此賊耳宰相楊士奇曰求立陳氏後者太宗初心
也求之不得乃郡縣其地故叛亂相尋今陳氏既
有後因其請立以息吾衆何謂無名漢棄珠崖前

史榮之安在示弱乎上曰士奇言是皇祖言朕亦聞之乃諭罷兵召沐晟黃福及所遣官吏將士皆還三年王通山壽等至京下廷鞫與馬騏俱論死籍其家赦交趾令具陳氏嫡屬以聞利遣使上表言陳暲病死陳氏絕國人推利守國以俟朝命朝廷始覺其詐然不欲興師詔切責之明年利奉表謝罪貢方物乃赦利權署國事八年利死子麟嗣英宗正統元年遣使入賀詔封麟安南國王七年

麟死子濬嗣天順三年濬為庶兄琮所弑國人誅之而立濬弟灝灝死子暉嗣暉死子敬嗣敬死弟誼嗣誼為母戚阮种所弑國人復誅之而立灝庶子凋凋暗懦羣下專政多殘暴社堂燒香官程嵩詭名陳嵩作亂弑凋自立凋有臣曰莫登庸者少業漁嘗夢入龍宮服袞冕以膺力徵為禁林衛士凋之死也登庸恥之乃詐降嵩而與大臣阮宏裕等謀攻嵩嵩敗走更立黎氏庶孽黎諲諲甫十歲

政柄一歸登庸久之登庸偽加九錫稱鎮國公嘉靖元年自稱安興王謀廢諱不果諱懼出奔清華依其母戚鄭氏尋卒登庸更立諱弟憲五年奉表請封憲為安南王未幾逼憲禪位遂篡之尋弑憲黎利傳十世一百一十年遂僭號大越皇帝改元明德分所部為十三路各置布按二司以擬中國九年登庸禪位其子方瀛偽稱太上皇十五年黎氏舊臣鄭惟僚泛海至京奏登庸僭逆事言黎諱尚有子曰黎

寧當立請興師討賊上命兩廣督臣潘旦覈其實
旦言黎莫二氏皆篡逆之賊欲假天朝名號以為
之主只宜靜以觀其變可也時上方銳意用兵乃
召旦還以侍郎蔡經代之十六年冬命咸寧侯仇
鸞兵部尚書毛伯溫調兵便宜勦撫十七年蔡經
奏曰安南之役宜六道並進以一年計用兵三十
萬器甲七十三萬金餉倍之今討賊以繼絕為名
而黎氏之裔真偽莫別豈惟彼國人心渙不可收

即勞逸之形似亦宜審處矣廉州知府張岳亦言
安南情形可以計降未可遽以兵力取也疏入皆
不報經問岳曰空言罷兵無以塞明詔奈何岳曰
必令登庸納地貶號匍伏詣闕聽上處分經曰如
此能令登庸聽乎岳曰是可傳檄而致也於是經
以兵事屬岳仇鸞毛伯溫既至岳持前議而叅政
翁萬達諸所策皆如岳言伯溫善之十九年秋方
瀛死登庸乃立其孫福海遣使自列伯溫等乃馳

檄諭登庸父子宜束身來投待以不死若復執迷
終為大戮且文皇之烈在其慎處之更諭其國人
有能擒斬登庸父子自上公以下賞格有差九月
仇鸞伯溫帥師抵南寧將入關登庸大懼請以十
一月詣鎮南關降萬達等乃於關內築昭德臺置
黃幄開幕府登庸率其從子文明及臣耆士庶候
關外乃開關登庸褰衣跣足繫組持降書北嚮跪
岳為解組受其書乃頓首謝姑令戴罪還恭聽處

置而遣指揮王良輔送文明赴京奏曰安南自漢
晉雖稱內附然夷俗瘴鄉終不宜中國大率數歲
一亂又必數歲而後定昔張輔以十餘年勞費創
置郡縣叛者相繼卒歸於夷此明驗也叅酌前世
利害莫若外而不內如以登庸負罪未宜受爵其
孫福海似可原宥別與以都統總管如漢唐故事
所謂以夷治夷者也至黎寧雖稱黎氏裔或又以
為阮塗子或以為鄭氏詐俱難憑信念修貢已久

若遺裔尚存查勘得實仍令於漆馬江居住量給
土田不致失所惟聖明裁察登庸亦上表謝罪從
之乃降安南國為安南都統使司以莫登庸為安
南國都統使改所置十三路俱為宣慰司飭守臣
勘訪黎氏後乃授黎寧以清華府使承宗祀制下
登庸已死授其孫福海如敕命二十年班師各陞
賞有差二十五年福海卒子宏漢嗣穆宗隆慶中
宏漢卒子茂洽嗣初黎寧之授清華也雖居一隅

而黨類實繁寧死其臣鄭檢立其子黎寵寵死無
子更立其宗人黎維邦維邦死子維潭襲神宗萬
歷二十年維潭與其臣鄭松謀攻殺莫茂洽復徙
居安南

莫氏傳國五世
共六十四年

茂洽之子曰敬恭出奔高

平遣使告急督臣陳大科上言蠻夷易姓如奕棋
然不當以彼之叛服為順逆而當以彼之叛我服
我為順逆黎維潭將恢復是圖而莫茂洽者固職
方之貢臣也安得不請於朝擱然肆戮竊謂黎氏

擅興之罪不可不問莫氏子遺之緒不可不存儻
維潭泥首乞命如登庸故事然後姑示優容而撫
茂洽之裔割以一州比諸漆馬江不翦其祀如是
處置似乎差宜惟陛下裁之上集廷議皆如大科
言未幾維潭叩關繫組請降詔以維潭為安南都
統使而授莫敬恭為高平令維潭死子維新嗣維
新死子維祺嗣柄由鄭氏不入貢者十數年

國朝既平兩粵順治十七年春高平令莫敬耀納款

具表言臣祖莫登庸前明嘉靖間受封安南都統
使黎氏殘黨鄭惟僚倡亂更求別族之子偽名黎
寧佔據清華府萬厯中惟僚之孫鄭松復攻殺臣
祖茂洽奪其敕印併有安南蒙故明撫臣安插臣
祖敬恭於高平伏惟

盛朝興滅繼絕乞仍錫前封願効貢職於是廣西巡
撫于時躍以敬耀率先向化且欲為黎氏勸請封
敬耀為安南都統使疏聞報可敬耀死子元清襲

已而黎維祺死子維禔聞高平莫氏已內附亦遣使納款康熙二年復貢方物

朝廷頒賞有差維禔死康熙三年

欽差國史院編修吳光禮部司務朱志遠弔祭維禔其子維禧援例請封五年春遣侍讀程芳朝郎中張易賁賚敕印冊封黎維禧為安南國王是年奏請六年兩貢許之永著為例六年秋維禧既封王爵發兵攻高平元清敗績率其妻子族屬數百人

奔皈朝皈朝滇界也七年正月始聞於

朝兩廣督撫提鎮諸臣皆以黎氏擅兵宜加誅討

上不許遣侍讀李仙根主事楊兆傑往諭維禧令以高
平地歸元清而諭元清將高平府地界及散亡家
屬數目列冊報聞既而二使臣抵安南維禧不肯
奉詔使臣反覆開諭相持四十餘日乃導

旨僅以高平之上琅下琅石林廣淵四州退還明年維
禧復發兵戍高平元清赴廣西告變時將軍線國

安副都統王永年提督馬雄議調兵請討維禧懼
乃撤戍十年維禧死弟維錠嗣十二年遣陪臣來
告哀會吳三桂反維錠復與其臣鄭櫜攻高平元
清不支與子敬光敬暉等挈家奔泗城於是黎氏
盡有高平之地十四年維錠死弟維正嗣十九年
大兵會勦雲南時莫元清已死其子敬光等與泗
城土官岑繼祿為嚮導二十年雲南平

上命將莫敬光及所從家屬送歸其國安插毋致殘害

二十一年巡撫郝浴遣通判王國正張士貢守備
李芝蘭等送莫氏歸國敬光懼不敢歸未至關自
殺敬暉亦脫身亡走其家屬凡三百餘人至安南
維正悉殺之二十二年六月

欽差侍讀鄔黑郎中周燦弔祭維禔又遣侍讀明圖
等冊封維正為安南國王

上以維正不從吳逆

御書忠孝守邦四字賜之二十四年維正遣陪臣入謝

明年納貢二十八年禮部遵

旨移咨廣西勘問安南以莫敬暉事維正具表乞廣西
巡撫王啟元代奏言莫敬暉等妄稱二王三王通
結吳三桂殘黨侵掠國內諸州等語大抵事多誣
罔曲為諉罪三十年維正遣陪臣奉貢復齎奏本
申辨莫敬暉敬暉事自是而後六年兩貢如期不
懈五十五年維正卒子維禔嗣來告哀請遣陪臣
入京陳奏奉

吉黎維禔既請遣人陳奏應如其所請准其遣陪臣赴
京陳奏可也五十八年三月

欽差內閣中書鄧廷詒編修成文弔祭維正並冊封

維禔為安南國王

節舊志叅唐
宋元明諸史

舊志論曰昔漢武帝西征大宛入牂牁夜郎南平
甌閩暨粵東西以其餘力定交趾九真日南三郡
如反掌然何其烈哉元混一區宇以宇內之全力
不能下一安南何也漢以文告而元以兵威也余

觀漢武時樓船下瀨之師未嘗渡富良也龍編諒山之域不以煩戍卒也禮所謂修其政不易其俗者殆庶幾乎先武能閉西域之關而不能忘徵側之叛雖銅柱標名千古爛然而海徼之役實始作俑蓋即建武之功已不可方於元鼎而元無論矣明初兩鋤南交擒其罪人而郡縣置之豈不稱烈然旋平旋叛則非勝之難也乃守之難也迨宣宗時覆軍殺將徒潤野草帑餉不繼海內為虛欲不

息兵勢不可得而議者以三楊棄安南為失策豈知老成碩畫固未易為少年喜功者道歟正嘉中黎莫構隙爭欲得中國之典為重而中國亦察其情隨宜處置要之羈縻勿絕固亦無損國體傳曰上者因之其次整齊之最下者與之爭西京之時寬其文網而因其習俗故其民安東京之時導以禮法而恐以兵威故其民疑至漢之季而吏病民民亦病吏幾於不可收拾唐宋而後又有甚焉墨

吏利其山澤之貲以安南為奇貨赭山而治竭澤而漁虎狼之性急則反噬而邊臣樂以功名自樹今日募兵明日轉餉馘首未聞而捉衿肘見其效亦可睹矣夫漢置交州為刺史者一為郡守者二邑令不過數人明則列為三司分為十七郡州縣且以百計而又鎮以中官豈非委片臠於郊衢呼羣獍而助之鬪者耶聞之掌故若叅政馮貴已有墨聲而中官馬騏尤甚初政若斯後將安極宜乎

交人之屢叛也昔合浦郡多墨吏珠移之交孟嘗
為郡去珠復還安能盡得若人布之南交令夷人
不敢輕中夏哉

李仙根曰交趾即安南即交州即日南西北自交
岡來故曰交趾東北界廣西東界廣東西界雲南
西南界老撾即古哀牢南插入大海中通占城秦
漢時皆郡縣也黎氏王國在富良江西後三峯山
左鞍子山右傘圓山插入雲霄富良江左右纏抱

前入大海亦南荒一都會也所屬有十三道五十
二府二百一十九州縣都統莫氏惟高平一府四
州在北隅之東俱無城郭其人被髮以香蠟梳之
故不散跣足足無塵滓以地皆淨沙也男女衣皆
大領無分別無帑庫女有無褶圍帑其王與官或
時冠帶鞞靴然非其好也稱其貴人曰翁茶翁茶
者大官也其牛羊猪燒去毛即割而食之只有燒
酒時刻喫檳榔惟睡夢方停嚼耳每用藥物塗其

齒黑而有光見人齒白者反笑之惟王宮用黃瓦
官民不敢用瓦以草苫楹棟以竹房檐高四尺許
門高不過三尺俛首折腰乃得出入即王殿檐高
不過丈許其屋外多種刺竹甘蕉椰子諸樹其果
四時長生無定其氣候常煖其土產惟稻無二麥
有布最纖輕有蠶桑綿綢曰交兌素絹如畫絹潤
二尺多榕樹柑橘有波羅蜜果如南瓜味微甜中
有子如刀豆子皆可食其象牙香藥綿花胡椒茴

香醬醋等物皆自外來者無棹椅特為使臣造二
公座甚高大其宴棹圓彩金漆高可尺許絃似花
辦其文字與中土同另作數十字多加土傍與使
臣往復文書不用也臨賀公館在富良江之東去
國二十里許以竹為牆每天使至一次則加竹一
重其風俗淫蕩無恥洗浴便溺男女裸體往來坐
立不相迴避雖貴家亦然其豪家稍有床褥平民
則無貴者以網為篋兩人擡之大貴者有轎似車

上轎盤脚坐或用八人四人擡之最可笑者其王
傘扇轎夫全體俱露止用一股青布纏腰從尻下
裹勒至臍雖寒天不著寸衣又皆形狀肥實名曰
好漢聞多係殺人援救者其兵止穿大袖青衣一
件天暑即裸並無甲冑其器械尚銃藤牌鎗刀諸
物頗精於飾以之大用殆不足也頗讀書知文字
而好怪異無傳授不甚貫通尚巫鬼不奉二氏之
教以能強言者為功故根有四字評之曰愚曰疑

曰詐曰傲愚則不認理疑則不信人言詐則其言不可信傲則自謂無罪此四字如銅牆鐵壁牢不可破也

朝貢方物

康熙十四年例

每貢金香爐花瓶四副重二百零九兩銀盤一十二口重六百九十一兩沉香九百六十兩速香二千三百六十八兩降真香三十株重二千四百觔白木香五十件重一千觔中黑線香八千株白色

土絹二百疋長四十尺犀角二十座每座一觔六兩共二十七觔八兩象牙二十枝每枝十九觔共三百八十觔

朝貢官從

陪臣三員通事一員行人四員從人十三名

朝貢事宜

欵貢之年分巡道預詳督撫檄傳該國王取入關限期國王乃遣使并通事領賫夾板公文投遞本

道屆期使臣將貢物運至坡壘驛龍憑關守備探
實具報本道即移駐太平府料理委驗貢官帶銀
匠馳往將貢物細驗稱明造冊呈道發示啟關而
新太叅將先領官兵至關上擺列及把守各隘口
本道於啟關三日 prior 由太平府率南太兩府官同
至思明土府駐劄次日至受降城又次日至幕府
營由幕府營至關十里是夜四更後發號鼓三通
各土司兵馬齊集先行護衛

龍亭前至昭德臺本道與府廳大小官隨行至關分

班拜謁

龍亭行三跪九叩首禮畢本道委思明土府同知祭
關門土神事畢龍憑關守備稟領鎖鑰擂鼓放炮
唱開關即發

皇令旗二面出關喚通事引吏使將恭進表文及貢
物捧進入關叩謁

龍亭其關外夷從人並皆羅拜事畢本道與各官隨

送

龍亭旋陞昭德臺堂上公座各文武官謁畢次各土
官領目兵叩見次喚夷官叩謁乃開櫃驗明貢物
封訖面詢夷使倘有漢土棍徒指稱餽送索騙情
弊可即指實報名查究各夷使目共稱文武漢土
官員人役毫無指索南國草木咸霑露潤本道隨
即命南太二府取花幣並龍憑二州備牛酒先將
花幣犒賞入京進貢夷官次賞護貢物回國夷從

又將牛酒犒勞吏官吏從與漢土官兵查進貢吏
官吏從共二十一員名正使陪臣一員賞鍍金銀
花一對重二兩大紅雲緞一端副使陪臣二員每
員各賞鍍金銀花一對重一兩六錢各大紅雲緞
一端通事官一員賞銀花一對重一兩二錢大紅
雲緞半端行人四名每名賞銀牌一面重八錢各
紅布一疋從人一十三名每名各賞銀牌一面重
五錢各紅布半疋以上所需花幣銀兩二年初貢

時議以思明府思明州憑祥州上下凍州各捐助
以勦大典當時上下凍州思明州二土官各助粉
銀二十兩應折紋銀十兩共實銀二十兩而知府
又捐俸銀二十兩九錢

今各土屬捐項俱免

至犒賞夷官吏

從及各衙門人役漢土官兵人等牛隻酒米例龍
憑二州出辦龍州出二憑祥出一共牛四十隻酒
一百埕米三十石裁酌多寡賞賚明白其護貢之
夷官吏從受賞出關歡頌而去仍擂鼓放炮唱開

關諭龍憑關守備督令把關門及各處隘口兵丁
慎加防守三日之後方撤隨將貢物表文吏官吏
從名數登記姓名轉報督撫並委押貢文武職官
各一員思明州河下登舟由水路往其應用裝載
貢船六隻乃思明土府思明州出辦送至崇善縣
逐程交替由廣西過楚乃抵京師若貢使歸國則
禮部題議差司賓序班伴送至廣西巡撫照例委
官伴送又委太平知府親詣啟關驗放夷使回國

仍照前接貢之例設立

龍亭及致祭昭德臺關門土神事畢龍憑關守備領鎖鑰唱開關逐名點驗出關取具文淵州吏官印結收領繳府就即封關具文通報督撫司道查考附按典彙云永樂十四年五月英國公張輔言自廣東欽州天津驛經猫兒港至涌淪佛淘從萬寧縣抵交趾多由水道陸行止二百九十一里比邱溫故路近七驛甚便於往來從之嶠南瑣記云粵

西入安南有三路一路由憑祥州出鎮南關一日
至文淵州一路由思明入邱溫者過摩天嶺一日
至思陵州一路由龍州入一日至平西隘又紀要
云思明抵南關百餘里南關抵交州五百里惟諒
山至鬼門此百里山菁深險頗多溪澗稍勤跋涉
餘俱平坦大道可以方軌聯轡渡富良江之西即
為交州

廣西通志卷九十六